

१०७

दर्ता नं.:४८/२०७६/७७

पुर्खा दय्क तकगु सम्पत्ति, भीगु कला व संस्कृति  
**पिकाक-भक्तपुर नगरपालिका**



पुर्खा दय्क तकगु सम्पत्ति, भीगु कला व संस्कृति

# स्वयंदा

नेपाल संवत् १९४३ चौला गा/२०८० वैशाख १/२०२३ Apr/ ल्या: ८१, दौं:५

पुर्खा दय्क तकगु सम्पत्ति, भीगु कला व संस्कृति

## भक्तपुर नगरपालिका

### भक्तपुर नगरवासी



## बिषय नगरपालिकाया

## बिषयालय जूनु

## प्रगतिशील भजन या धिं धिं छल्ला

## बिस्का जात्राया सद्भाव न्यालीया सभा

(२०७९ चैत्र २६ गते)



## बिस्का नखा बांलाक हानयता सुरक्षा निकाय प्रमुखपुं नपां बैठक

(२०७९ चैत्र २६ गते)



; DkfbSlo

@\*) jzfv !, c^s !)&, jif%

## बिस्का नखा व न्हूगु दाँ २०८० या भिन्तुना

थी थी पंगःत हाचां गायो २०७९ सालं त्वःत वान । ०७९ साल नपां देशां देछिया स्थानीय तहया निर्वाचन जुल । ७५३ गु पालिकाय् न्हूंपू जनप्रतिनिधिपिसं बहाली यात । संघीयता छ्यलानिं जुगु नेकगू निर्वाचनं त्याकः वपुं स्थानीय तहया जनप्रतिनिधिपिन्के विकासया ज्या न्ह्याकयगुलि अपलं जोश व जाँगर खानय् दः । शासक दलपू छगाथि जुयो निर्वाचन ल्वागुलिं निर्वाचनय् विचः व सिद्धान्तया धिंधिं बल्ला जुयमःगुलि जनतां उकिया सबः काय मखां, मती तय् मफः । पार्टी नेतातयगु स्वार्थया लागिं छगू पार्टी आस्था तयो तः पिसं मेगु पार्टीया नेतातयता त्याकय् मःगु अवस्था वल । गुकिं जनतात निराश जुल । पार्टीया न्ह्यलुवापिन्ता घुकीं क्यनयता वा पार्टीया निपंया असन्तोष प्वकः जनतां स्वतन्त्र उम्मेदवार पिन्ता भोट बियो त्याकला ।

थुगुसी हे प्रतिनिधिसभा व प्रदेश सभायाय् नं निर्वाचन जुल । ने.का या न्ह्यलुवा माओवादी नपांया छगू गाथि व एमाले न्ह्यलुवाया मेगू गाथि चिडः चुनाव ल्वाता । चुनावय् ने.कां न्ह्यलुवाया गाथि चिडः ल्वागु पार्टीपिसं बहुमत हला अथेनं प्रधानमन्त्री जुयगु खाँ मिलय मजुसेलिं निर्वाचन धुकः प्रचण्डं एमालेनपां मिलय जुयो सरकार निःस्वाना । एमालेया समर्थनय् माओवादीया नायो प्रचण्ड प्रधानमन्त्री जुला । प्रचण्डं विश्वास कः बलय् संसदया दकलय् तः हांगु दल ने.कां. नं समर्थनय् भोट ब्यूसेलिं गाथिचिडः जू पिनिगु मनय् भ्रखा ब्वयक जुल । राष्ट्रपति निर्वाचनया इलय् तक थयं बलय् वं मेगु हे पहः काल । प्रचण्डं राष्ट्रपतिखय् ने.कां.या उम्मेदवार रामचन्द्र पौडेलपाखय् ल्यूसेलिं एमाले व माओवादीया गाथी ब्यडः ने.का. व माओवादी छगाथि जुल । सत्ताया निंतिं शासक दलत गुलितक बेइमानी व गज-गजगु भांगः लाय्फः धाय्गु छपा क्पिा थुगुसी बांलाक स्वय दत ।

आर्थिक रूपं देश ताट पल्टय् जुइगु पहः खानय् दयो वल । ब्यापार घाटा उलि थुलि हे धाय् मफयक क्व ब्वाडः वाडः च्वना । दाच्छिया १७ खर्ब स्वयो अपः व्यापारघाटा जुगु दः सा २१ खर्ब स्वयो अपः वैदेशिक ऋण दः गु तथ्याड्कं क्यडः च्वंगु दः ।

चालु आ.व. या च्याला दुनय् २५ अर्ब ७ करोडया जाकी व २२ अर्ब १८ करोडया तरकारी विदेशं हःगु तथ्याड्कं नेपः या बूँ गुलि अन्न तरकारी सयकः च्वनालय् धाय्गु खाँ सियदः । बूँ जक मखु फुक्क लागाय् देश भन-भन कतया भरय् लालां वाडःच्वंगु दः ।

ब्वनामिपिसं नेपःया कलेज व विश्वविद्यालयता विश्वास भन-भन म्हवँ यायां यंक च्वंगु दः । वांगु च्याला दुनय् उच्चशिक्षाया लागिं विदेशय् बूँ वानिपिनिगु लाइन यक्व यक्व हे ताः हाक खानय् दत । शिक्षा मन्त्रालयं ८० ट्ठ ब्वनामिपिन्ता विदेशय् बूँ वानय्गु स्वीकृत ब्यूसेलिं अःनेपः या तःगु हे कलेजत ब्वनामिपुं मदयो तिय मालिगु अवस्था वय धुकल । दाच्छिया थयं मथयं छगू खर्ब तका दां शिक्षाया लागिं जक विदेशय् पुलः च्वंगु दः ।

न्हिया न्हिथं ज्यामरुपं मनूत अप्वयो च्वंगु दः । ज्या मः वानय्गु इवलय् न्हिं च्यास-गुस मनूत विदेशय् वाडः च्वंगु दः । न्हिं स्वम्हा प्यम्हासिया सी म्हा (लास) बाकसय् स्वथाडः भीथाय् छ्वयो हई । शासक दलया नेतातयसं रेमिटयान्सं देश न्ह्याकः च्वडागु खाँ ल्हाडः जुइगु । छगू नं उद्योगत चाय्केगु स्वई मखु ।

देया बूँ अन्न अपलं मसय्कसिं मगात । उकिया लागिं देसी सः या कारखाना चाय्केगुलि सरकारं मति तक मतः । देया यक्व थासय् बूँ बाँभ तयो तःगु दः । दे हे विदेशीतय्गु लाहातं न्ह्याकय् बियगु ज्या शासक दलतयसं याडः च्वंगु दः ।

वांगु २०७९ साल राजनीतिखय् बेइमानी, भांगः लाय्गु व नेतातयसं विश्वास तांकगु दाँ खः, आर्थिक काथं नं कतया भरय् म्वाय मःगु दाँ व राजनीतिक काथं तालयमलागु दाँ काथं बितय् जुल । न्हूगु दाँ २०८० खय् थजगु फुक्क मचः मगागु पाखं स्वयो, सयकः देया सार्वभौमिकता ल्यकः तयता, थःगु हे तुतिखय् दानय् फँगु अर्थतन्त्रया विकास व थःगु हे देशय् ज्या दय्के फँगु दाँ काथं ह्य्याय् फय्मः सकलसिता बिस्का नखा नपां न्हूँ दाँ या भिन्तुना ।

पिकाक-ख्वप नगरपालिका/सम्पादक-आशाकुमार चिकबञ्जार, डेस्कटप-धन लक्ष्मी त्यात, आवरण सज्जा-रेणु ध्वजु, थाकू- भक्तपुर अफसेट प्रिन्टर्स फोन ल्याः ०१-६६९३०४३, इ-मेल- khwopapau@gmail.com

# सच्चिदा लिपाया स्वप दे

## इयदा लिपाया नेपः दे

- नारायणमान बिजुक्छैं (रोहित)

**जियोम्हा पासा कृष्ण,**

छिं छ्वयो हःगु असारया पौ थ्यन । मनयाखॉ छतिं हे लिक्कुकः मतः से निश्छल काथं तयो द्यगुलिं अपलं सुभाय देछाय् ।

छिगु पौ ब्वँ ब्वं वाडा बलय् दे भन भन ख्यौयो वांगु नपां गालय् दुडु वांडः च्वंगु व उगु स्थितिं थाकाय् हे मफैगु मति तयो च्वंगु जुयो च्वना । छं उकीं थःम्हाहे ब्यक्ति या देश व नेपःमि पिनिगु जुयतांगु दुर्दशा वा अभ्र धाय्गु खः सा विध्वंस व अस्तित्वया खॉ न्हिथाडः हल । जीवन व जनताप्रतिया छंगु चासो पाय्छि हे जू । अलय् जिं छंता तस्कं ग्यापुगु म्हागस खाडः च्वंम्हा नपां गुब्ले म्हागसं दानय् मफूम्हा व सुथाय् सिया ह्यांगु लिभःया कल्पना नपां याय्गु त्वः तम्हा मनू काथं सिडुकः च्वडा ।

पासा, जीवनयाता अथे खः दक । चा न्ह्याक्व हे ताः हासां अलय् ख्वाउँसां सुथाय् मजूसें मगा, लुमुगु लिभः च्वाप्व गूँ, पहाड पर्वत व छँ मत्वई हे मखु । खःधात्थें पौ खय् न्हिथां थें छ छम्हा सरकारी कर्मचारी जुयो ३३-३४ दा इमानदार जुयो सेवा यात, अवकास नं जुइन अलय लच्छिया ५-६द दामं छंगू जीवन न्ह्याक्य माली । पौखय् छं थः नपां व थः स्वयो लिपा नोकरी यापुं क्वयया स्तरया कर्मचारी पिसं मथां मथां प्रमोशन जूगु नपां विदेशीत नपां मिलय् जुयो अलय् विदेशीतयता देया गुप्त नक्सात त तथ्य-तथ्याडक बियो करोडपति जूगु दसु नं ब्यगु दः । थःपुं निर्देशक, सचिव व मन्त्रीपिन्ता धाय्कः, चाप्लुसी, चुक्ली मयाइपुं, खॉ बट्टा मजपुं, उपहारत मयंकिपुं वा चुनावबलय् लाखौं लाख तका दां थीथी योजना वा ठेकेदारत नपां मिलय् जुयो मछ्वइपुं इमानदार कर्मचारीत आनाया आना हें तुं लाड च्वंगु नपां मन्त्रालय, विभाग, संस्थानत व जिल्लातहया कार्यालयसं नपां थःथिति, भाय व जातयाता कायो च्वयया पदय् यंकिगु ज्याखं छं तस्कं दिक्क जूगु खॉ प्वंकल ।

कृष्ण, फुक्क ज्या खॉ व बन्दोबस्त स्वाभाविक व नियम काथं जुइगु जूसा, सुधार (लह्वनय्गु) व ह्यूपा नं मालिगु मखुज्वी । अलय असन्तोष व विद्रोहनं मजुइगु जुई । थौंक्न्हें देशय् जुयो च्वंगु (रगताम्य) हि खांक जुयो च्वंगु अराजकता व आतडक्या हनि थज थजगु अनियमितता, स्वार्थ, शोषण, वेवास्ता, थिचोमिचो, पक्षपात व शक्तिया दुरुपयोग हे जुगु खायँ विवाद दैमखु ज्वी ।

पौखय् छँ छम्हा छम्हा मनू न्ह्यागु हे पद व जिम्मेवारी खय्च्वंसां इमानदार जुयमःगु सल्लाह न्यडागु उकीं मेपुं स्वयो थःगु

आर्थिक स्थिति च्वमज्यागु खॉ नं न्हि थांगु दः । नेट्र प्यट्र थमनं बांलाक म्हासियापुं कर्मचारीपुं मध्ये छं नं छम्हा बांलाम्हा कर्मचारी काथं स्वय दयो जि तस्क. लयताया । नेम्हा प्यम्हा सरल कर्मचारी खाली त्वा चुलाकयता जक सरकारी नोकरीखय् पला तै अमिसं थः जहान परिवारया भिं जुइगु बाहेक देश व जनताया अपलं भिं जुइगु वा मजुइगु नपां छु नं मतलब याइ मखु । गुम्हां गुम्हां सरकारी कर्मचारी जुयो इमानदार जुयो देश व जनताया अपलं भिं जुइगु स्वइपुं वा सेवा याय्गु भावनां नोकरी याई । गुम्हां गुम्हां 'सरकारयाय्गु खयो मनसें सुयाय्गु खयो नय्गु' अलय 'पदय च्वंडाबलय हे कमेमयासा गुब्ले याय्गु' धाय्गु मति व तातुना ज्वडः नं नोकरी खय् पला तै । अमिसं पदया दुरुपयोग याडः भ्रष्टाचार, अनियमितता व याय् ज्यगु मज्यगु न्ह्यागुनं ज्या याडः थः काय् म्हाय, थः थिति व चिच्याहांगु स्वार्थता हृदाय तयो ज्या सानि । अलय् धेबाया लागिं हे विदेशीतय छुपें जुयो ज्वी । थःगु देशया मालिक थः पुं जनता हे खः धाय्गु भावनाता पिंकः विदेशीया च्यो जुयोज्वी । देया नागरिक व कर्मचारी जुयो थःगु हे देश व जनताता गः कियगु ज्या याई ।

अथेनं कृष्ण, अजपुं विश्वासघाती पिसं धेवा मुंक तः तः खागु छँ दांसां अमिगु ऐस आराम् यागु खानिबलय् छंता ईष्या नं जुल ज्वी अलय् थःगरिब जूगु खाडः हिनताबोध नं जुल ज्वी । धात्थेंगु खॉ अथे मखु, छंकय् अजपुं विश्वासघातीत खाडः इष्यां मखु घृणा वय मःगु खः । थःगु गरिबीखय् मन क्वताय्केगु मखु गर्व याय् मःगु खः । छाय् धः सा छं नोकरी यातलय् इमानदार जुयो यात, छम्हा भिंम्हा नागरिक जुयो ज्यासान अनियमितता, भ्रष्टाचार व पक्षपात थजगु व्रैगुणं छ तापाक्क च्वन अलय विश्वासघातीत स्वयो छं थः ता पाक म्हासिडिका पिबवत ।

पासा, भ्नी छन्हू ब्रुहा ब्रुही जुइतिनि । उगु इलय जीवनय् भ्नीसं याडागु छगू छगू घटना भ्नीगु हःनय प्याखं ल्हवई । उमेरं भ्नीता भिंगु व मभिंगु चिच्या-चिच्याहांगु खॉ हे ज्यगु मज्यगु मति भ्नीसं थानय् फै । छ याकचा च्वनयबलय् थमनं याडागु देश भक्तिया ज्या व योगदानत लुमाडः वैबलय् मनय् छगू काथया सन्तोष व आनन्द मति वै । गुब्ले गुब्ले सिडुकं नं मसिडुकं याडागु छगू नेगू बांमलागु ज्यात लुमाड वैबलय् नुगः ख्वै । अलय् छं जीवं कःछि हे थुइकः देश व जनताया भिं जुइगु ज्या छम्हा कर्मचारी जुयो सेवा वा संघर्ष यागुलिं छ न्ह्याब्लें गौरव, सन्तोष व आनन्दं ल्यं दःगु जीवन

## सच्छिव न्हयगूगु स्वप पौ, बःछि पौ(पाक्षिक)

हानी । छंपुं काय् म्हायायुं व थः थितिपिसं छं पाखं इमानदार जुयमःगु ज्ञानकाई । अलय् छ समाजया नितिं ब्वस्यलाम्हा मनु जुई ।

थुकिया अखः देश व जनताता धोखा बिडुपुं विदेशी व भ्रष्टाचारीपुं नपां मिलय जुयो करोडपति व अरबपति जूपुं कर्मचारीपुं थः अवकास जुय धुकः जिवं मफयो वयवं थमनं याडागु फुक्क मभिं गु ज्या, हाकुगु ज्यात व कतता गः कियागु लुमांक है अलय म्हागसय नपांथारा थारा न्हुई, थःगु अपराधं याडः अपुं बांलाक न्हयो वयकः देनय फैंमखु । अय्ला व मेमेगु अमल नयो त्वडः जक देनय फैं । म्हास्युपुं च्वयया क्वयया कर्मचारीपिसं हःनय् ज्वज्वलपा धःसां लिनय् लिनय् 'श्व तहांम्हा भ्रष्टाचारी, ज्युगुं मज्युगुं ज्या याडम्हा देशया कानय मज्युगुं खाँ विदेशी तयता बियो देशता हे गः किडम्हा विश्वासघाती देश द्रोही खः' जक धाई । गुम्हासिनं श्व विश्वासघातीया स्वंगु पुस्ता नर्कय् वानी ' जक धाई । श्व भ्रष्टाचार याडः दयकः तःगु छँ दुड व भ्रष्टाचारी उकिं हे ल्हाइ' जक सरा बिई । गुम्हां गुम्हांसिनं वाता म्वाडः च्वंम्हा सिकं दः (जिउँदो लास) धाई ।

कृष्ण छं सियाला, अजपुं देशद्रोहीया काय् म्हायायुं नं गुम्हां अपुं थें हे अपलं भ्रष्ट जुयो नरकया जीवन फयो ज्वीसा, सडगत व बांलाक ब्वडः जूसां थ.मां ब्वाया हाकुगु ज्या सियुवं बुढाता याकचा त्वःतः तकी । अमि खराबपुं काय् म्हायायुं गुलिसिनं आत्महत्या याई । गुम्हा अथें फोहरखय् च्वंपुं त्वँकी थें बामलागु अपराध याड घच्यापुगु जीवन हाडः च्वनि । गुलिं विदेशय् वानकीं ल्याहाँ वयगु खाँ हे ल्हाई मखु । सीयत्यःगु इलय् व विश्वासघातीत पश्चाताप अपराधबोध व न्हांकय् मफैगु पापया प्वः घाडः भौचा खिचा थें गौरवहीन जुयो सी ।

छं न्हयसः तयफः पाप याडः जूसां धेबां ताँ छुय् फःपुं मनूतय मनय न्ह्याथिन्यगु भावना तःसां पिनय्या खाँ ल्हाड जुइ मखुनी ।' व नं सत्य खाँ मखु । छगू धात्थेंगु खाँ कानय, नां धःसा काय् मखु । भ्नीगु देशया छगू नेगू न्हिं न्हिं छ्यलिगु दैनिक उपभोग्य वस्तुत तयगु भः थाब्बा क्वब्बा यायगु वयायगु लाहातय् दः धनया ल्याखं व छम्हा देया अरबपति, खरबपति जुई । चान्हय अय्लां कायानिं वं थः पासापिनिगु हःनय् खाँ ल्हवयो है - भ्नी अरबपति व खरबपति जुयां छुयाय् ? भ्नीता जनताया शोषक धायो थुकलं बिडुगु विदेशी दलालदक शत्रु भःपिडुगु । भ्नीसं तःगु कारखाना तयो तयागु दः । यक्व मनूतयता ज्या बियो नसा चू लाक तया, सरकारता लाखौं लाखया कर पुलयगु सत्ताय् वानिगु पार्टीता चुनावया इलय् मः क्वः चन्दा बियगु । नेता व मन्त्रीतयता छँ सःत भ्वय नकयगु अलय् थाय् थासय्या धार्मिक संस्था मथः देगः दानयता पूजा पाठता अपलं चन्दा बियगु । गुली शैक्षिक व सामाजिक संस्थाय् भ्नी जिवंकःछि दुजः जुयो च्वडा । गुलिं न्हि पौ वापौ व पत्रकारपिन्ता न्ह्याब्लें चन्दा बियगु, अथेनं छम्हा नेम्हा बाहेक ९९ ब्व जनतां

जिमिता थिय मत्योपिन्ता याथें ब्यवहार याडगु । भ्नीके सम्पति दयां छु यायगु : भ्नीता यां ग्वलय् ताकय् लाकः हाकलं पाकः लकामः क्वखायकः चाहिडुकिगु जुई ... अनेक तनेक ।

पासा कृष्ण, छं पौखय् ग्यापुगु छगूनेगू खाँत न्हिथाना । गुकिता जिं लिसः मब्यूसें मगा । विश्व बैङ्क (WB), अन्तर्राष्ट्रिय मुद्रा कोष (IMF), विश्व ब्यापार संगठन(WTO), बहुराष्ट्रिय कम्पनीत सं.रा.अमेरिका, नाटो (NATO) थजगु थी थी संस्थाया अपलं लिच्चः लाडः वगु नेपः दे थजगु चिच्या चिच्याहांगु विकासशील देया भविष्य मरु धायगु खाँ छं अपलं क्वः छित ।

श्व तस्कं निराशावादी व कर्मचारी भावनां क्वत्यय्क च्वंगु मानसिकताया खाँ जक जिं ताय्का । खः छं धः थें सं. रा. अमेरिकां नाटोया देशत मुंक छगुः तटस्थ दे युगोस्लाभियाता हमला याता । थः म्हा कतामारी सरकार निःस्वाना, आनाया राष्ट्रपति मिलोसे बिचता बलं, अपहरण याडः सं.रा. अमेरिकाया इच्छा काथं न्ह्याडम्हा खःलाखः जकया तथाकथित 'अन्तर्राष्ट्रिय अदालत' हेगय् कुनय यंकला, भूतपूर्व सोभियत गणराज्य लाहातय् काय्ता अलय उगु देशया खनिज धन थःकय लाकयता, रूस व चीनयतक राजनैतिक दवाब बियता, दक्षिण एशिया नपां मध्य पूर्वया अरबदेशतानं थःगु शक्तिं क्वत्यल तयता संसारया दकलय् गरिब देश मध्ये छगू अफगानिस्तानता हमला याता अलय् थःम्हा कतामारी सरकार निःस्वाना । नपां संसारता जनताया इच्छाकाथं सरकार दय्के बियता प्रजातन्त्रया नामय् सः सुकः हः जुम्हा मध्ये सं.रा. अमेरिकाया बस प्रशासन थमनं हे इराकी सरकार व प्यालेस्तानी जनताया न्हयलुवा हिलयगु तप्यंकः घोषणा याता ।

सं.रा अमेरिकी साम्राज्यवादया श्व फुक्क प्रजातन्त्र व मानव अधिकार विरोधी ज्या इवः तः याडा नं प्यालेस्टाइन व मेमेगु खायें सं.रा. अमेरिकाया प्रशासन नपां बेलायत बाहेक फुक्क नाटो देशं बिस्कंमत जाहेर याता । सं.रा. अमेरिकाया गुलिनं हैकमवादी नीति या चीन, रूस, भारत, मलेसिया, एसिया, अफ्रिका व लाटिन अमेरिकाया अपलं देशं नं विरोध यागु दः । उलि जक मखु प्रजग कोरियां व क्यूवा थजगु समाजवादी देशं तप्यंक हे अमेरिकी साम्राज्यवादया क्वत्यलिगु ज्याया विरोधय् ल्वायगु हाँक बिल । श्व फुक्क खाँ खं हलिमय न्ह्याब्लें एक धुबीय जुयो च्वनि मखु । अलय सं.रा. अमेरिकाया एकाधिकारया विरोधय चीन, युरोपेली संघ थः हे अलय मेगु तेस्रो विश्वया देशत दाँ वैगु पक्का नं खः । विश्व बैक, अन्तर्राष्ट्रिय मुद्रा कोष व विश्व व्यापार संगठनया आर्थिक थिचोमिचो वा न्हँगु उपनिवेशवादं याडः नं भ्नीगु देशया सार्वभौमिकता व स्वतन्त्रता हे मदैगु जुलदक पीरकायो च्वनय स्वँः । युरोपेली देशया जनता जक मखु अमेरिका, अफ्रिका, एशिया व ओसेनियाया देशत नपां जनतां नपां अमिगु विरोधय् ल्वाइतिति ।

कथहं ...

# भिंपुं व बांलापुं न्हयलुवात ब्वलांकय्ता स्काउट तालिम बियमः

प्रमुख प्रजापति



ख्वप नगरपालिकाय नं नगर स्काउट निः स्वानय् धुंकल । नगर स्काउट्या (मायो बायो) संरक्षकख्य नगर प्रमुख व नायोखय् उप-प्रमुख च्वनिगु ब्यवस्था दः । नगर स्काउट निःस्वानय धुंक ख्वप नगर दुनय्या फुक्क ब्वनय्कुथि स्काउट निः स्वानय्गु कुतः जुयो च्वंगु दः । ख्वप नगर दुनय्यँ अः ९२ गू ब्वनय् कुथित चाय्क तः गु दः । श्वनं हौं जिमिसं स्काउट प्रशिक्षकपिन्ता तालिम बिय धुन ।

असल, देशभक्त व इमानदार नागरिक ब्वलांकय्गु जिमिगु तातुना खः । थौया ल्यासे ल्याम्हो ब्वनामिपिन्ता बांलागु शिक्षा बियगु नपां अनुशासित, इमानदार व नैतिकवान दय्के फः सा दक कन्हे देशे बांलापुं न्हयलुवात ब्वलांकय् फै । देयाता मपुं बांलापुं न्हयलुवात ब्वलांकय्ता स्काउट तालिमं ग्वाहाली जुइगु जिमिगु विश्वास खः ।

संकटया इलय नं छतिं हे भमनूसे संयम जुयो ज्यासानय्गु, न्ह्याब्लें मेपिनिगु गथे भिं जुइ दक बिचः याड, जुइपुं नपां ग्वाहालिमि जुयो ज्या सानिपुं स्काउट्या बांलागु पक्ष खः । थजगु खाँयाता बिच, याडः ख्वप नगरपालिकां स्काउट्या पासापुं नपां इलय-ब्यलय सल्हा बल्हा याड अन्तरक्रिया याडः नपां ज्या साडः वयागु दः। हलिमय ब्यागु कोरोना भ्वल्वयया इलय थानाया स्काउटया पासापिसं यागु ज्या च्वछाय् बहजु । नगरपालिकाया इनापय् जुइगु सुचुकुचु ज्या, प्रचार-प्रसार, ल्वयजूपिनिगु

छँ छँ वाडः वास नय्गु, नसा ब्यवानय्गु ज्या वयकपिसं ग्वाहाली याडः दिल । थःगु जिउ वास्ता मयासें कतया जीउया चिन्ता कायो ज्यासाडः दिल । व तस्कं च्वछाय् बहगु ज्या खः । नखा चखा, जात्रा - पात्राया इलय भक्तपुर स्काउटं मदिक ग्वाहाली याडः च्वंगु खाँ थाना न्हि थानय् बह जू ।

ख्वप दे, देया दकलय् चिच्याहांगु नगरपालिका खः । अलय् थाना विश्व सम्पदाया धलः खय् नां जःगु लाय्कु नं दः। नेपः या तः जगु, लोकं हवागु डातापोल्लें, डय्डापा इयो, लुँधवाका, म्हवय्खा इयो, वास्तुकलाया ल्याखं तसकं च्वजः गु नमूना थाना दः । थौं छिकपुं आनाहे भायो स्वयो दी । लाय्कु, त.माही व दतात्रय लागा पर्यटकीय ल्याखं तस्कं महत्व कःधाड, च्वंगु थाय् खः । थाना दाछिया लाखौं पर्यटकपुं स्व भाई । वयकपिसं पुलद्यूगु धेबां सम्पदा ल्यंकः म्वाकः- तय्गु, शिक्षा, स्वास्थ्य, सुचुकुचु थजगु ज्या व विकास निर्माणय् खर्च याडः वयों च्वडा ।

नगरपालिकां थमनं हे च्यागू कलेज, १०० गू शय्याया बेदया ख्वप अस्पताल चाय्कः वयो च्वंगु दः । वडा-वडाया स्वास्थ्य केन्द्र, छँ छँ नर्स सेवा, फुक्कसिया च्वय थ्यंक ब्वनय् दैगु काथं शैक्षिक ऋणया ब्यवस्था यायां शिक्षा व स्वास्थ्यखय् देया च्वजःगु सेवा ब्य ब्य वगु नगरपालिकाकाथं हज्याडः च्वंगु दः । इमानदारजुयो जनताया सेवा याय्गु हे जिपुं जनप्रतिनिधिपिनिगु मंकः प्रतिवद्धता खः ।

थःगु हे मौलिक सीप व प्रविधिता ल्यंकः म्वाक तः तं पुरातात्विक सांस्कृतिक व ऐतिहासिक महत्वया लागाया अध्ययन व अनुसन्धान व उत्खनन् (हिल-माल-मूलः) यायां प्राचीन ख्वपया सम्पदात ल्यंकः म्वाकः तय्गु कुतः याडः वया । थानाया मूर्त व अमूर्त कला संस्कृति ल्यंकः म्वाकः तय्गु

ज्या जिमिसं हदाय् तयो याडः वया । जिमिसं थःगु तुतिखय् दानय्गु ज्याखय् जक विश्वास याडः वहे काथं ज्या नं याडः वया । जिपुं नेपाल मजदुर किसान पार्टी पाखं त्याकः वयापुं जनप्रतिनिधिपुं खः । नेपाल मजदुर किसान पार्टी वैज्ञानिक समाजय् विश्वास याइगु पार्टी खः । थुगु पार्टीया न्हयलुवा नेपः या वरिष्ठ राजनितिज्ञ का.नारायण मान बिजुक्छें जुं याडः च्वंगु खः । ख्वप नगरय् हिगु वडात दः व फुक्क वडाया नेपाल मजदुर किसान पार्टीया पासापुं त्याकः वगु खः । पार्टीया नायो भाजु का.रोहित जुं ख्वप देया कन्हेया म्हगस काथं सच्छिदा लिपाया ख्वप दे (१०० वर्ष पछिको भक्तपुर) नांया (साफू च्वयो द्यूगु खः । थौं स्वयो नीदा हौं च्वयो द्यूगु उगु साफूति वयकलं थुगु नगर 'सुथाय् स्वयबलय् प्राचीन सहर थें च्वंगु न्हिनय् विश्व विद्यालय थें, बहनी पुलांगु मौलिक पहया वसतं पुडः च्वम्हा सुन्दरी थें च्वनिगु हलिमयया तस्कं बांलागु नगर जुइगु' म्हगस खांकः द्यूगु खः । जिमिसं श्वहे साफूया लिधंसाय् ख्वप देता हकनं ल्हवनय-कानय याडः च्वडा । पुलांगु पहःता ल्यंकः म्वाकः तय्गु कुतः याडः च्वडा ।

अः वयो ख्वपया महत्वपूर्ण लागाया अध्ययन याडः स्व स्वं मन ह्वयकः दिसँ । छिकपिनिगु दिन भिं जुयमः । गनां मछिं मगा जूसा जिमी पासापिसं ग्वाहाली याई । लिपा हकनं-हकनं नपा लाइगु विश्वास कायो हकनं छक लसकुल याय् ।

(नेपाल स्काउटया ग्वसालय जुगू खुकगु एसिया प्रशान्त क्षेत्रीय मेसेन्जर अफ पीस राष्ट्रिय संयोजक पिनिगु सम्मेलनय् ब्वति काय्ता थी थी देशं भः पुं स्काउट प्रतिनिधिपिन्ता लसकुस याय्गु ज्या इवः सं ख्वप नगरपालिकाया प्रमुख सुनिल प्रजापति जुं बियो द्यूगु न्वचु ।

## कोशी प्रदेशय् अशान्ति जुगुया जिठमेवार सु ?

विवेक

संघीयता देशय् छ्यःगु नं न्हयदा दत प्रदेश १ कं नकतिनिजक नां छ्यता तः लागु जुल । प्रदेश सभाया ९३ म्हा दः पुं मध्ये ८२ म्हासिनं कोशी प्रदेश नां छ्यगुलि मत बिला । संविधान काथं स्वब्वख्य नेव (दुई तिहाई) बहुमतं प्रदेशया नां क्वः छिडागु जक धाला । प्रदेशया नां छ्यता तः लागुया लसताय प्रदेश ब्याक बिदा नं बिल । अलय व लसता तात तेक्य जुयो चवनय मफः । उगु क्वछिडा खाँया विरुद्धय जातीय पा लिड हः जुइपू पक्षधरपिसं म्हासिडका (पहिचान) या लिधांसाय नां छ्यमः धायगु खाँ तयो आन्दोलन न्ह्याकल ।

कोशी प्रदेश अः बन्द हडताल याडः च्वंगु दः । प्रदर्शनकारी व प्रहरीया, दशवी न्हिया न्हिथं ल्वापु जुयो च्वंगु दः, अलय अपलं (दर्जनौ) घाइटे जुय धुंकल । घाइटे मध्येया छम्हा पदम बहादुर लिम्बु सीय नं धुंकल । आन्दोलनया भन भन मि ग्वाड च्वंगु दः । आन्दोलनकारीतयसं ओखलढुङ्गाय मुख्य मन्त्रीया विरुद्ध नाराबाजी नं यात, अपुं च्वड, वगु मोटरे अपां कयकला, कोशी प्रदेश च्वयो तःगु साइन बोर्डत लिकायो वांछ्वयो च्वंगु दः । आन्दोलनकारी तयसं कोशी नां लिमकः तलय आन्दोलन दिक्क मखु धायो च्वंगु दः ।

प्रचण्ड न्हयलुवा जुयो यागु १० वर्षे सशस्त्र संघर्षय भारतया साथ व ग्वाहाली दःगु खः । उगु आन्दोलनया इवल्य देया हिं न्हयद्व नागरिक पिसं थःगु प्राण बलिदान याता । अलय राज्यया खरबौतकाया सम्पतित धू याडः बिला । माओवादी आत्मनिर्णय नपांया जातीय राज्ययाय खाँ

हःनय हला । २०६२ सालय् माओवादी शान्ति प्रकृयाय् वय धुंकः प्रचण्ड थाय् थासय् वाडः जातीय राज्य क्वः छ्यू छ्यू जुला । वं लिम्बुवान, किराँत, शेर्पा, तमुवान, मगरात, ताम्सालिड, थारूहट, नेवाः गणराज्य नां क्वः छ्यू छ्यू जुला । उब्ले वयाता यक्व सिनं लाहापा थाडः लसकुस याता । अः वयो वहे खाँ वाता माकया गर्लथे जुयो च्वंगु दः ।

२०६४ सालया संविधान सभा निर्वाचनय् नं आत्मनिर्णयनपांया जातीय नारा बियो माओवादी याकचां प्रत्यक्षय २४० गू मध्ये १२० गू सिट त्याकला । सच्छिगू स्वयो अपः जाति व गुडगु स्वयो अपःभाषाभाषीत दः गु देशय् व मज्यगु (गलत) ज्या खः । उगु इलय हे नेपाल मजदुर किसान पार्टी नपां मे मेगू पार्टी नं विरोध यागु खः । थी थी जातिया दशवी छपा छधि (समन्वय व सद्भाव) जुयो थःवं थः या भावनां जायकः मिलय जुयो च्वंपुं नेपः मि पिन्ता जातीय लिधंसाय् व्वथल लिपालिपा थ्यंक, नेपः मिपुं जातीय ल्वापु म्प्वनिगु काथंया व छगु जः जक खः । संसद व सडक उकिया तच्चकं विरोध जुल । जनतां खाँ थुइकथुइकं यंकल । माओवादी रक्षात्मक (थःता पानय् मालिगु) अवस्थाय् थ्यन अलय न्हांगु संविधान सभाया विघटन जुय धुकः जातीय नारा हछ्याइम्हा माओवादी १२० सीटं ३०/३४ सीटय् क्वहँ वसेलिं जातीय राज्य ध्याक्वनय लः वान ।

संयोग हे धायमः अःप्रचण्ड थः हे प्रधानमन्त्री खः । वं ह्वःगु ल्वापुया मिपुसां अः कोशी प्रदेशे मिन्वयो च्वंगु दः । वं

थमनं हे लिम्बुवान गणराज्य क्वः छ्यूगु खः । थमनं हे क्वः छ्यूगु लिम्बुवान प्रदेश फ्वंपुं नागरिक पिन्ता अः प्रहरी दमन याडः च्वंगु दः । उकीं माओवादीया नायो प्रचण्डया कुबुद्धिं (पाखण्डी व्यवहारं) याडः हे अ, कोशी प्रदेशे अशान्ति जुगु खः । थुकिया जिम्मेवार प्रचण्ड हे खः ।

माओवादी तयसं थः ता दकले बांलापुं खाँती कम्युनिष्ट दक क्यनयता आत्मनिर्णयनपांया जातीय राज्य दयकेता सोभियत संघया ख्वःहनयतय् हैगु । उब्ले लेनिन व स्टालिनया न्हयलुवाय यागु सोभियत संघया आत्मनिर्णय नपांया जातीय राज्यमा व्यवस्था दःगु दाबी याड उगु कम्युनिष्ट पार्टीया सिद्धान्त व बिचः थें कःघाइ मखु काथं प्रचार-प्रसार याडः जुला । अमिसं थी थी जात जाति पिनि दशवी जातीय लिधंसाय् ब्यागलं तयगु मति तयो जूपुं खः । अलय दे लिपा लिपा थ्यंकः जातीय युद्धय् दुफ्वाडः कमजोर याय तां पुं खः । अमिसं खः धसां मखु धःसां अमि मालिकया इच्छा वहे खः ।

धात्थें खय्क धायगु खःसा सोभियत संघ निःस्वानय् हाँ आना महासंघया ब्यबस्था याड तः गु दः । सन १९१७ या बोल्शेभिक क्रान्ति लिपा नपां चवनय मन मरूपिन्ता छख्य लिडक चवनयगु अधिकार बियो तःगु खः । वहे काथं सन् १९१८ खय् पोल्याण्ड व फिनल्याण्ड महासंघं ब्यागलं च्वँ वाना । सन १९३६ सय् स्टालीनया शासन कालय दयकगु सोभियत संघया संविधान १९३६ सं नं थी थी गणराज्यत बिस्कं चवनय फैगु आत्मनिर्णयया अधिकार

## सच्छित्त न्हयगूग स्वप पौ, बःछि पौ(पाक्षिक)

ब्यूगु खः । सन १९९० या दशकय् कम्युनिष्ट पार्टीया नेतृत्व मदय् धुकः आना संविधान काथं थी थी गणराज्यत बिस्कं बिस्कं च्वना उगू दे अः हलिमयया नक्सखय् १५ गू क्वचा खय् क्वचा दयो च्वंगु दः ।

उगु इलय सं. रा. अमेरिकाता फूर्ति (चुनौति) क्यनय फःम्हा देश सोभियत संघ जक खः । सोभियतसंघ कमजोर मजतलय हलिमय अमेरिकां थःयाथें याय् मफैगु खाँ अमेरिकी शासकवर्ग बांलाक थू । अमिगु ग्वसः काथं देश चिच्या चिच्या क्वय्कः क्वचा थलय धुक गुलिं देशत अमेरिकाकाय् ग्वाहाली फ्वडः अमिगु शरणो वाना । अः लिपा वयो रूसता क्वः थय्ता युक्नेनया राष्ट्रपति जेलेन्स्कीता सं. रा. अमेरिका नपांया साम्राज्यवादी देशं ग्वाहाली याड दां दां निसें युक्नेनता युद्धखय् दुफ्वाड तला । युद्ध गुलि ताः हाता सं.रा. अमेरिकाता उलि हे फाइदा जुई । अमेरिका ल्वाभः (हतिगार) या व्यापारी खः । रूस युक्नेनया ल्वापुं अमेरिकां मति मतयाथें दां कमेयाडः च्वंगु दः ।

नेपः कमजोर जुसा जक नेपःया शासकत भारतय् शरण कः वैगु भारतीय शासक वर्ग बांलाक हे थू । माओवादीता सशस्त्र संघर्ष याय्ता अनेके काथं ग्वाहाली ब्यूगु नेपः दे अमिगु लाहातय लाकय्ता हे खः । भारतता माओवादी मंदयो मखु । कम्युनिष्ट पार्टी मनदःगु जूसा आनाया सरकारं भारतीय कम्युनिष्ट पार्टीता छाय् क्वत्यल न्ह्यो छ्वई ? माओवादीया लिधंसाय भारत नेपः या राजनीति थःगु लाहातय लाकय्गु मति खः २०६२ सालया ह्यूपा लिपा भारतं याडः च्वंगु ज्याखं व खाँत अपलं स्पष्ट जुजुं वगु दः ।

माओवादीता जातीय राज्यया नारा हचिइकय् ब्यूम्हा नं भारतीय शासकत हे जुयमः धाय्गु अनुमान याय थाकु मजु । वर्ग संघर्ष स्वयो जातीय संघर्ष याय् अःपुइ ।

कम्युनिष्टतय्सं वर्गसंघर्षता जक विश्वास याई । सकल शोषित पीडित जनताता थःगु वर्गया खाँ ग्वाकः चित्त बुभ्के याडः संघर्षया लागिं ग्वाकय्गु तस्कं थाकुगु ज्या खः । माओवादी विदेशीया इशाराय देया अस्तित्व हे धूधू मधू जुइगु काथं जातीय राज्यया खाँ बय बय याडः जुला । धाथें खय्क जातीय राज्य दयकगु खः सा भारतं नेपालता मथां हे जालय स्वथाड छ्वैगु जुई ।

न्हापांगु संविधान सभाय् माओवादी सचेतक पोष्ट बहादुर बोगती छथाय् न्हिथांगु खः । 'जिमिसं वर्ग संघर्षया खाँ ल्हाडः जुतलय् छम्हा कार्यकर्ताक नं दय्के थाकुला, गुब्ले जातिया खाँ ल्हाड । उब्ले अपल अपः मनूत पार्टीं द्रुहं वला ।'

अमिगु ग्वसः काथं देश चिच्या चिच्या क्वय्कः क्वचा थलय धुक गुलिं देशत अमेरिकाकाय् ग्वाहाली फ्वडः अमिगु शरणो वाना । अः लिपा वयो रूसता क्वः थय्ता युक्नेनया राष्ट्रपति जेलेन्स्कीता सं. रा. अमेरिका नपांया साम्राज्यवादी देशं ग्वाहाली याड दां दां निसें युक्नेनता युद्धखय् दुफ्वाड तला ।

जातीय राज्यया छगू दसु नाइजेरियाता काय् फः । आना ३५० स्वयो अपः जातजातित दः । सन १९६३ सं स्वंगू राज्य संघीयता चायकगु देशय् थौं थी थी जाति तय्सं थःथःगु स्वायत्त राज्यया माग याड आन्दोलन नपां नपां ३६ गू दय् धुकल । अथेनं आना जातीय ल्वापु मब्यनि । सन् २००४ य् जुगु जातीय ल्वापुखय १० लाख मनूत सीय धुकल । मेगु अफ्रिकी देश रुवाण्डाय नं हुतु व तुत्सी जातिया दथ्वी सन् १९९४ खय् जूगु द्वन्द्वखय आना थयं मथयं दाच्छिखय् जनसंख्याया च्याब्व निसें

हिब्वतक अथेधायगु च्यागू निसें हिगुलाखति मनू सीय धुकल ।

थुकाथं स्वयवलय् जातीय युद्ध तस्कं गयापु । नेपालय् थुकीं तुतिं चूया दे हज्याय्गुयां त्वः त हे छ्व देया अस्तित्व हे अखय्ला थखय्ला मदयक बिई । थी थी जात जातित दःगु छगू काथं बांलागु पक्ष नं खः । अपलं जाति, भाय् व संस्कृति दःगु थः हे तः मिगुया छगू म्हासिइका खः । उकिता मखुकाथं छ्यलः धःसा समस्यां लितुमतु ल्यू वैगु नं बिचः याय् मः ।

फुकक जात जातिकय् थःथःगु जात-जाति व संस्कृतिमा माया दै । उकिता ल्यंक म्वाकः तय्ता राज्य बिचः याय् मः । अलय प्रदेशया नां छुयाता जक हे ल्वापुयाः सा मेमेगु जातिता अमिगु खाँनं मनिनय फः । अपलं प्रदेश सभाया दुजःपिनिगु समर्थनय् भौगोलिकताया लिधंसाय नां छुय धुकः उकिता हिलयनं मफैगु खानय दः । छाय् धःसा प्रदेशया नां व राजधानी छु, गना तय्गु धायगु अधिकार संविधानं स्वापु दःगु प्रदेशता बियो तःगु दः । सरकारं संविधान हाचां गायो मेकाथं नं क्वः छिय नं फैमखु ।

'कोशी' नां छुगु मिलय मजु दक ल्वापु थाडः हःपुं 'पहिचानवादी' पिसं थःथःगु भाय् संस्कृति व जातित ल्यंकः म्वाकः तय्ता प्रतिष्ठानत दय्केगु, भाय्या ब्वनय्कुथित व कलेज निः स्वानय्ता बःयाय्गु व उकिया लागि संघ व प्रदेश मः काथंया व्यवस्था याय्गु याडः अःपुकः ज्यंकः लाँपु क्यनय्ता हज्याय्गु हे आन्दोलनता भिंगु थासय् यंकः दिकय्गु जुय्फः । नपां लिम्बुवान गणराज्य जब क्वः छ्यूम्हा जुः जुयो च्वम्हा प्रधानमन्त्री प्रचण्डता थमनं न्हपा याडागु क्वःछिडा खाँ मिलय् मजु धायो आत्मालोचना याकय्गु पाखय् वांसा आन्दोलन मथां हे थातय् लाइला ?

## न्हयःया अभियान - ल्वहंया खुसी

पूर्ण वैद्य

हासाचाय् लाः थें त्वादयाचवंगु साक्सला  
वानाचवंगु प्रस्तुत लँ  
जिगु न्हयःने स्वप्नवत बाः वनी  
खुसि जुयाः,  
भन छगू न्हयसः जुयाः  
बैतर्णी थें श्व हे छगू छियेमाःगु समस्या जुयाः  
न्या जुयाः बिइ मफुम्ह जितः  
न्याया न्याय स्वीकार याये मफुम्ह जितः ।

भैलः खः या बल थें  
यः यः थाय् साला यंकेगु कृतः यानाचवंगु लँ  
म्ह ध्यनाकाःगु हे वाःमचाः म्ह  
ल्हाः तुति मदुगु हे मस्यूम्ह  
जि श्वँ, अय्लाखं लश्व  
नाथा भैलः छः मखु  
तन्त्रया साधनय् बलि जुइत  
केवल यन्त्र प्रभुया प्रस्तुति थः कानाः सिइत नं  
जि मिखा तंम्ह सभ्यता मखु  
सासां वनाः भर्तिलाय क्वव्वायेत ।

जिगु पलाः छ्वाखेरं  
थःगु मू का.वः पिं लँ  
आकर्षण, मोह ... ..  
आताहां दना जि यन्त्रवत्  
उलिमिलि सनाचवंगु लँया किमिद्वय् ।  
जि दुने छगू सेन्ट्री निर्माण जुयाचवन श्व क्षण  
मानौ छगू देश न्ह्याः वयाचवन  
छम्ह मनू दनाचवन श्व हुलय्  
लँयागु चक्रव्यूह दुने  
घेरा दुने ।  
स्वस्वं स्वस्वं स्वःस्वः थाय्  
प्रस्तुत लँ हे पःखाः जुयाः दनाबिइ हानं  
छगुलिं मेगु, मेगुलिं मेगु त्यला वनाचवंगु लँ  
स्केटिंग म्हिताचवंगु घालय् हिलय्

श्व नक्शाया वाहियात सिमा रेखा  
जि मिखाय् जाः जुयाः भुनी  
कुरुक्षेत्रय् लाल कयाचवंगु लँ  
सरयू खुसिइ म्वःल्हुयाचवंगु यदुवंशीत  
गुलि सीमित आयु श्व ल्वहंतय्  
जिगु तुति स्वयाः पुति हाकःगु लँ  
सिंह दरवारया लुखाय् समर्पित  
ध्वाकाय् ज्यू-हाजिर सतक  
छगू सानदार होटेलय् वयाः न्हाय् दइगु सतक  
कौचय् चामाः तुला सिनाचवंगु लँ  
बारया दुने, पेगया दुने  
चञ्चल सीमित लँ  
पशुपति... बालाजु  
प्रतिक्षण लिलाम न्यंवयाचवन  
श्व सतकया ।  
आत्महत्या याना वना चवनागु वाः मचाः गु लँ  
थः नापं चुइका वना यंकाचवंगु  
खुसि श्व छधी ल्वहंया  
भ्रम भ्रमं स्वाना वनाचवंगु लँया  
श्व हस्तान्तरणय्  
सहीया इवः इवः आखः गवः  
थम्हं थःत मखंका  
थःगु मू तयाः मियाचवंगु मूल्यया अवमूल्यन  
उत्सुक श्व हे लँ वइगु बजारय्  
ल्वहं जुयाः न्ह्याः वनेत  
सः मदुगु श्व च्वापुया खुसी  
थःथःगु लिलामय्  
ककोटक नाग नापलाये मफुगु श्व लँय्  
भी शिला-नदी बाःवनाचवना  
न्हयः धाये मफुगु न्हयलय् ।  
सन्तोष भीत भीगु ताहाकःगु मृत्युइ  
मोह भीत भीगु पुलां ल्वय्या ।  
कै चिरय् यायेवं सातु वंपिं शान्तिवादीया अनर्थ

## सच्छिव न्हयगूगु स्वप पौ, बःछि पौ(पाक्षिक)

वयाच्चवना प्रस्तुत लँय् मचात घना  
यानया निन्द्रित यात्रुत  
न्हयः या अभियान  
न्हयःया प्राप्ति केवल ।  
न्हयल्य् तिप्यनीगु पतिं  
प्राप्तिं घाःगु ल्हाः  
मथंगु त्यान्नुगु तुति  
छु अर्थ श्व मण्डपया लँया  
ल्वहंया खुसिया ।

उद्घाटन लँया न्हापां  
तुतिया जुइमाः  
मिखाया जुइमाः

छ्यं, नुगः घानाः मन् छम्हं थम्ह जुइमाः  
लँ ला तुतिया उपलब्धी जक मखा - !  
भसुकाल्य् खना बुलुहुं  
आः पलख  
च्यानाच्चवना थुया वः थें वः थें  
न्यातापोल घुतुकैत्यंगु जिगु जुगया अजुगति  
छम्ह साः कुबियावःम्ह ज्याथ ज्यापुया मिखां  
सकसिगु मिखा प्वाः तिना तयेफुम्हसिया  
त्वाः श्वःगु सः  
चटकेया सः  
लँ धकाः ब्वाँय् जुयागु संकीर्ण खुसिया सः  
न्याया न्याय स्वीकार याये मफुम्ह जितः  
न्या जुयाः बाःवने मफुम्ह जितः ।

(सितु ४:२४:१०८८)

## गरीबया ईजत मदुला ?

(वा दे या लोक बारखं )

छगु गामय् स्वम्हा तताक्येहेँ दु ।  
स्वम्हसिया नं इहिपा जुई धुंकल ।  
भाग्यया कपालं ला कर्मया खेलं याना  
दक कान्छीम्ह क्येहेँ नय्मखं थाय् लात ।  
व नय् मखम्ह केहेँयात दक्व ततापिसं हेपे  
याईगु । च्योथें ज्या याकिगु । छन्हु मामं  
“असमेर जोगीया” पुजा यात । दक्व  
थःथिति पाहां व्वन ।

तर थः म्हयाय् जूसां व गरीबम्ह  
म्हयाय्यात मसःतु । अथवा पाहां मबवं ।  
ल्वःमना मसः तुगु जुई धका व  
थः मचा ज्वना मांया छें वन । दक्व  
पाहांत समाः याना भिंभिं वसतं पुना  
वइच्चंपी । थः जक भ्वाथःगु व बांमलागु  
पुलां वसः जूगुलिं वयात अन फ्येतुई  
मछाल । दक्व चकती फ्यतुना चवन ।  
मामंनं फ्यतु मधाः । छगु शब्द नं नं  
मवा । अले मनय् जायक खँ तया  
सह्यानां सहयाय् मफुगुलिं छें लिहां वल  
मचा नापं ।

छन्हु अथ्ये हे वाध्य व विवशतां  
याना तताया छें वन । सि स्वकल । सि  
स्वगुलिं चक्कि छमना ज्याला बिया  
छ्वल । ज्वना क्येहेँम्ह छें लिहांवल  
नय्पित्यापिं थः मचाया खूँ ख्वा लुमंका ।  
सन्ध्याई जुई घुंकूलि तताम्ह नं  
जा थुइत कोथाय् जाकि कावन । उबलय्  
लाक थःगु छ्यनय् सि छम्ह थुल । वाला  
काल । क्येहेँया छ्यें वना व चक्कि  
छमनानं लित हल सि छम्हा हे मस्वसे  
चक्कि यन धका ।

नय् पित्यागु थःगु प्वा व मचाया  
ख्वा लुमंकुं लुमंकुं व ख्वंख्वं न्हाय्कं मुं  
वन । न्हाय्कं मुना च्वंवल्य् व न्हाय्कंया  
कालय् बिई छम्ह खन । थःगु थलय् व  
विई तथा छें लिहाँ वल । छें ह्या दय्केत  
स्वबलय् थल मदु । थल माला छम्ह थः  
थें हे गरीबम्ह मनूयाके कन्ह्य सुथय् लित  
हयगु वाचा याना थल ज्वना बिई दय्कल  
चाः चा याना । बाचा ई जुई धुंकल ।

मचात ख्वया हल नय् पित्याना । मामं  
मचातय्त हेकु हेकु दक्वस्यां न्हयो वल ।  
सुथय् दना ख्वा सिला नीलः ज्वना तलय्  
स्वः वंबलय् व विई दक्व हिरा जुया  
चवन । दासि वया च्वंगु लः तलकय्  
जुया थिना चवन । व दक्व हुया व थल  
लित बिई यंकल । व थल थुवानं थलय्  
च्वंगु हिरा हुया कया जक छम्ह मन्  
जुल ।

ई फुनातुं वन । अथेहे न्हापाथें  
मामं “असमेर जोगीया” पुजा यात ।  
दकलय् न्हापां हे थःत सः तुगुलिं थः नं  
बांलागु वसः पुना मस्तय्त प्वा जायक नका  
मांया छें वन । अन स्वय् नकुबलय् वं  
मनः । व थः मनसे थःगु तिसा व वसःयात  
न न धका जबर्जस्ती हाला चवन । “छिमिसं  
श्व दः नकूगु मखु जिगु तिसा व वसःयात  
नकूगु” धका व छें लिहाँ वन ।

उलिं चिया बाखं थुलि, ध्यो तय्गु  
कुलीं ।

## करुण रसया घातु दुनय्या पीडा

आशाकुमार चिकंबजार



Credit to Photographer

मौसम हिलकिं छगू न्हुगु लयया म्येँ वहे हिकुनय् धवतुइ । रसं जाई । गनां विरहया सःश्वय्की, गनां लसताया न्हिलासु पिज्वइ । लायें वाँ वां थः ता थमं थःगु पहलय हिलासु वयकी । छगू विशेषता लोक म्येँया । अलय गुब्ले हे सुकु मचिइगु स्वं थें न्ह्याब्ले वाउँसे च्वडः च्वनिगु लय लोक लय् । वहे लोकलय् समाजं बुइकल, समाजं छ्यल अलय लोकया मनयें वलाग सिमा थें हाँ कायो भनभन भ्वेँचिडः वान । खः, धात्थें लोकम्येँ भ्नीगु ख्वःपा खः, भ्नीगु थःगु पहः खः । गुकिं भ्नीता न्ह्याब्ले भ्नीगु धाय्गु भावनां प्याक तै । उकीं हे धाई लोक साहित्य मरुगु जातिया सायद इतिहास नं दैमखु ।

मोहनीया मालश्री हाली, नुगः खाँ व्यंकी । सामाज्याया वामा थें कपः भाति क्वः छुकः, ह्योगु सिन्हं ह्योगु क्वखा क्वखाया ख्वालय अबिर तयो श्वेँ अय्लाया छुं भाति सुरय् लोक बाजा थाई । धिमेया सलय प्याखं ल्हूइ । धाँया सलय् तिं तिं न्हूइ । बाँसुरीया सलं मनय् खुलुलु मिंकी । धात्थें नलास्वं सापलय् छुयो कपः थिकु थिकु सांकमोहनीथें चं चं धाय्की । छगू सन्तोषया स्वंतकि तानी । मनय् न्ह्याक्वः हे पीर दःसां वहे लोक म्येँ लोक बाज्या सलं छगू उपचार काथं उपचार थें याइ । हिसिदःगु ख्वः पिलुयो ।

स्वन्ति वै छपु करुण रसं जःगु किजा पूजाया म्येँ छुई । तता व किजाया स्वापुया क्वातुगु दसु पिब्बई । सामाज्या नपां करुणामयया पुकारयायां बुरांज्या याई । बसन्तया म्येँ हाल यौवनया जोसवगु म्येँ नपां मन लय् ताय्की । 'वसन्तया बेलसं सिमाचुली

जायो व थें' मन जाय्की । होली वै रङ्गया उत्सवं जाय्क हिंसी ख्यालीया म्येँ हाली । वहे हिंसी ख्याली नपां वसन्तया यौवन त्वःतः ताल्लाया लिभलं बुलुहें क्वाकः, पुकः हः सेलिं मनय् छगू काथंया दिक्क दाक्क जुयो न्याउली ख्वइगु जक मखु, मँसिनंघायें/सु मनैगु खाँ वाङ्मय शताब्दी पुरुष सत्यमोहन जोशीजुं लोकम्येँ मुनय्गु इवलय् च्वयो द्युगु जुल । थुगु ई चिकुला तापाड ताल्ला वइगुलिं थाय्थासय् भुजिं नं भुनिगु जुल । श्वहे खाँ याता ख्वपया बिस्का जात्राय् मूलम्हा द्यो काथं भैलखतय् तैम्हा भैलद्योया बाहां जूगुलिं भुजिं वयो विस्काया खाँ काँ वगु दक लोकोक्ति नं धायो च्वंगु दः ।

**भैलद्योः**

डय् डाकु थासीमा खय् रानीया न्हासं प्याहाँ व पुं हलिं ( हाय्लिं/डायगन) ता स्याडः वहे ल्योसिंद्यो काथं पूजा याडः च्वंगु खाँ हलिमय ब्यासेलिं वहे जात्रा स्वय्ता कासी या विश्वनाथ नं ल्योसिंख्यलय् स्वः व बलय् तान्त्रिकं घेरे याडः ज्वनय् तां बलय् आनासं तुसुडः वानय् तांबलय् इज्जीखं कपः ध्यडः कःगु किम्बदन्ती स्वाडः भैल द्योया कपः जक थाना म्हा कासी धाइगु जुल । वहे भैलद्योयाता देगः दाडः थानासं तयो पूजा याडः च्वंगु लोकोक्ति नं दः । वहे भैरवया सहाराय् पृथ्वी नारायण शाह गोर्खा जुजुं हताल वबलय् भजन यासे - अथाहर दुःख वल, लोक नं त्रास चाल, विलम्ब मफाल' छलपोलं रक्षायाय माला' दक भैलद्योकय क्षमा पूजा याडः च्वंगु लोकम्येँ थौं नं दाफा भजनय् हाल च्वंगु दःनि ।

## सच्छिव न्हयगूगु स्वप पौ, बःखि पौ(पाक्षिक)

जुजु भुपतिन्द्र मल्लं डातापोल्हेँ दय्केता वहे भैरव नाथ नपां सल्लाह यागु खौं नं जनमानसय् ल्यं दः नि उकीं ख्वपया मू जात्रा मध्ये बिस्का जात्राता डालः भैल द्यो खतय् तयो लुयो नखा थौतक डाय्कः चवना तिनी । छम्हा दुःखया सहारा भः पियो ।

**बेतः द्योः** भैलखया अँसीखय्, दकलय हः नय् हपःबियो च्वम्हा काथं बेतःद्यो तै । तस्कं मूल्याहाम्हा जूसां, तस्कं बल्लाम्हा अलय् संकटया इलय साथ बिड्म्हा धायो डातापोल्हेँया गःजु याकचां पाछायो यंकः च्वय तय् यंकगु, बिस्काबलय् भैलख थातय मलाड, याकचां लुयो थातय, लाकगु थन्योगु किम्बदन्ती नपां दाच्छिखय् हिछला चिडः कोपुसां पुड्कः तःसां विस्का लच्छी मच्युसेँ थाडः तैगुलिं छँ छँ वयो स्वन्हयँ च्वड च्वंपिन्ता लुयो, इयाले, कःसि च्वडः च्वंपिन्ता घ्वाडः क्वफ्वाइम्हा धायो थुगु इलय् अपलं घःपः जुइगु दकबेतः द्योँ यागु धायो च्वंगु दः ।

**नकीं जु अजिमाः**

भद्रकाली मांयाता नकिंजु अजिमा धायो चिच्याहंगु नकिंजु खचा दय्क जात्रा याडः भैलखः नपां ल्वाकिगु चलन अः तक दः नि ।



**ल्योसिं द्योः**

ल्योसिं गुई नं दुगुचां च्वयो क्यंगु सिमा पाल, लुयो हयो चैत्रया मसान्त खुनुं थाडः बैशाख १ गते क्वः थैगु याड तःगु दः । थुकिया वलँ अष्टमातृका व हलिंपत नाग नागिनया काथं कायो च्वंगु दः । इतिहास विद पिसं विश्वध्वजा धःसां थानाया लोकं अःतक नं थुकिता वहे रानीया न्हासं प्याहाँ वपुं नाग नागनी हे धायो च्वंगुलि मेगू छु सत्यता दै व अनुसन्धानया विषय जुय्फ ।

**लाहामरु ल्योसिद्योः**

थुब्ले हे तालाक्व त्वालय् लाहा मरुम्हा ल्योसिद्योँ नं थानी । गुम्हा ल्योसिं द्यो कुम्ह दाजु पिसं थानय्गु व वहे दाफा/गुथि याय्पुं वडः ल्योसिंगुई वाड लुयो है । लाखुयो नयो लाहा पालः ब्यूगु खौं गनां गनां न्यनय् दः सां धात्थेगु खौं छु खः अध्ययन याडः स्वय माली ।

श्वहे इवलय् गोर्खाया जुजु पृथ्वीनारायण शाहं थः त्वाय् ब्वा ख्वपया जुजु रणजित मल्लयाता बुकसेलिं वयकलं च्वयो द्यूगु धातु म्येँ दुनय् छगू विरहया सः दः । विद्रोह याय् मफूगु बेदना व लहिडा खिचां डागु बाखं दुसुडः च्वंगु दः ।

श्वथे जागु रस

श्वथे जागु रस गबलय् नं दइमखु ।

**स्वप नगरपालिकाता न्ह्याबले सफा,  
सुग्घर तय्गु सकल नगरवासीतय्गु कर्तव्य खः ।**

## सच्छिव न्हयगूग स्वप पौ, बःछि पौ(पाक्षिक)

राम हँ जि गना वानय ॥धु।  
गन वनय् गन चवनय्  
सुया भरय् चवनय् दैव  
दैवया भरय् चवनय् जित तरय् मजु रे दैव ॥ राम हँ...।  
माम मदु बुबा मदु सुया भरे चवने दैव  
जवय् स्वसा दाजु मरु खवय् स्वसा किजा मरु  
जिपापी अभागी गनावना सियरे दैव ॥ राम हँ...।  
तःपुखु नःपुखु स्वय धकाः  
न्या जन्म कया दैव  
चण्डालम्ह खयया मचां  
जालं कयंका स्यातरे दैव ॥ राम हँ ... ।

न्यातापोल्हँ स्वय धका  
बखुंजन्म कयारे दैव  
चण्डालम्हा खयया मचां  
तुबं कयंका स्यातरे दैव । राम हँ ... ॥

ल्योसिं छयलय ल्योसिं थन  
चूपिं गालय म्वल ल्हूया  
वया च्वसं भडरव  
दरसन याय प्रभु ॥राम हँ ... ॥

अथेयां धातुम्यँ रणजित मल्लया पालाय् निसँ जक दःगु  
पक्का नं मखु । च्वयया म्यँ धातु लय्खय् जुजु रणजित मल्लं थः  
त्वाय् काय् खयया मचां याडा-याडागु मस्तार मदय्क दुःख बियो  
स्यागु व थःगु उब्ले आना थयंकया विचः थयंकय् मफूगुया बिरहया  
म्यँ खः, श्व लय गुलि पुलां अनुसन्धानया विषय खः । महारानी  
विज्य लक्षी (राजेश्वरी) सति यंकय्ता हःगु म्यँ थजु वा अन्य म्यँ नं  
धातु लय् चिड हालिगु अपलं दः ।

थास्वया पर्वत, क्व स्वयो समुन्दर  
समुन्दर हुनुनु हालरे देव ॥ राम हँ... ।

थथे थाना छ्यल तः गु समुन्दरया अर्थ तःतः हांगु खुसी दक  
सिडके मः छाय् धः सा भ्नीगु देशय् समुद्र मरु । अथेहे  
बालख गरभनं, प्याहाँ वया बेलसं  
प्राण मल्यनि थें चवन ॥ राम हँ ... ।

थथे स्वयबलय् धातुम्यँ दुनयँ संकट तांकःब्यु धाय्गु सड्केत  
जक दःगुला धाय्थें मति वानि । राणा कालय भ्नीराय् भ्नीरा  
वानिगु इलय व ब्वड यंकिगु इलय छँ व छँजःपुं लुमांक विरहया  
सःप्वंकः हालिगु म्यँ नं खःला धाय्थें च्वसां श्व वसन्तया अन्तिम ई

अलय् चखुंबखुं पशु-पंछी, प्राणीया मन ह्वइगुलिं रसरंगया म्यँ काथं  
नं हालय्गु या । वहे काथं ख्वपय ल्यडः च्वंगु छपु लोकम्यँ काथं -  
हलिंपतः फरफर सांकः ल्योसिं थाडः हल रे  
स्वःवानयनु,  
आसे आसे जिमि किजा मवनि  
द्योलिभः दहे दः नि  
हथाय् चायो दियमते पलख लाडः दिसँ रे ...  
भैलख स्ववानय् याता  
ग्वँ लभं न्याय माली तिनी  
जिकय् धःसा धेबा मरुनी  
कायो ह्य मानी रे आसे दाइचा ...

नेवः समाजय् भ्वँ नपां नखाचखाया इलय छुं छगु नसा नं  
नय मः गु याड तै । बिस्काबलय् ग्वः नय् मःगु नं धायो अः नं ग्वः  
मियो च्वनिपुं व न्याइपुं नं दहे दः नि । थुगु इलय् कःछँ व न्हँगु कय्गु  
ब्वजा याडः जा नइगु नं चलन दः । अलय् ल्योसिं थांगु लसताय्  
फुक्क दाफा भजनया मनु तय्सं मि छ्वय्कः दाफा भजन हालिगु नं  
चलन दः । सायद ल्योसिंद्योया कपालयत्क पू गाइगु पूखां धायो  
तकः काथं मि छ्वय्कगु खः ला वा मि छ्वय्क ताला सः तःगु खः  
बिचः याय् मः थें च्वं ।



थुगु बिस्काया खाँग्वः या अर्थ ज्याय् बलय् छगू बिस्कं  
पहया नखा धाय्गु कयं । अलय यौवन दासे वइगु ई काथं कायो  
संस्कृतिविद तेजेश्वरबाबु ग्वंगः जुं ल्योसिं गः योनी, ल्योसिं लिड्ग  
नपां भैलखः व नकिंजु खचा स्त्रीपुरुष काथं समागम (ल्वकिगु) खः  
धायो च्वंगु दः । ई काथं ख्वपय् चैत्र मसान्त सालया अन्त, बैशाख  
१ गते न्हँगु वर्ष (बिसं) सुरु जू काथं दाच्छी तक जात्रै जात्रा दःगु थाय्  
धः सां न्हँगु वर्ष नपां थुगु जात्रा धःसा स्वाय मछिगु खाँ इतिहास व  
संस्कृतिविद पिसं धायो च्वंगु दः ।

## स्वप नगरपालिकाया ज्या भवः त

### स्काउट स्वयमसेवी भावनां ज्या सानिपुं



चैत्र १३ गते

स्वप नगरपालिकाया प्रमुख सुनिल प्रजापति जुं नेपाल स्काउटया गवसालय जूगु खुकगु एशिया प्रशान्त क्षेत्रीय मेसेन्जर अफ पिस राष्ट्रिय संयोजक पिनिगु सम्मेलनय् बवतिकाय्ता थी थी देशं वपुं स्काउट प्रतिनिधिपिनिगु पुचलं सोमबार नपालाडः दिल । उगु पुचः ता लसकुल याडः दिसे नगर प्रमुख प्रजापति जुं, कन्हैया देया लागिं योग्य, अनुशासित, भिंपुं व इमान्दार न्ह्यलुवापुं बवलांकय्ता स्काउट तालिम बांलाइगु खाँ ब्याकसे संकटय् विचलित मजूसें संयमजुयो ज्या सानय्गु, न्ह्याब्लें कतया भिं जुइगु मतिं ज्या सानिगु, गवाहालीमि जुयो ज्या सानिगु स्काउटया बांलागु पक्ष खः धायोदिल ।

स्वप नगर स्काउटया संरक्षक (मायो बायो) नगर प्रमुख व नायोलय उप-प्रमुख जुइगु व्यवस्था दः गू खाँ ब्याकसे वयकलं स्वप नगरपालिकां स्काउट प्रशिक्षक पिन्ता तालिम बिधुंक्गु, नगर स्काउट निः स्वानय् धुंकः स्वप नगर दुनयया फुक्क बवनय् कुथि स्काउट निः स्वानय्गु कुतः जुयो च्वंगु खाँ व्याकः दिल ।

प्राचीन नगरया पहः ल्यंकः म्वाकः तय्गु कुतः स्वप नगरपालिकां याडः वयो च्वंगु खाँ ब्याकसे वयकलं स्वपया थःगुहे मौलिक सीप व प्रविधिता ल्यंकः म्वाक त तं पुरातात्विक, सांस्कृतिक, ऐतिहासिक महत्वया लागाया अध्ययन अनुसन्धान व उत्खनन (हिलः, माल, व मुलः) यासे प्राचीन स्वप नगरया सम्पदात म्वाकः

तय्ता नगरपालिकां कुतः याडः च्वंगु दः धायोदिल ।

ज्या इवः सं स्वप नगरपालिकाया उप प्रमुख रजनी जोशी स्वप देया इतिहास व नगरपालिकाया विशेषता बचाहाकलं काडः दिसे थानाया मूर्त-अमूर्त कला-संस्कृति म्वाकः तय्गु जिमिगु हःनय्या ज्या काथं साडः च्वडागु दः धायो दिल ।

प्रतिनिधि मण्डलया पुचः पाखं पिटर जे. ब्लाट्च ओ एम जुं नेपालया मचातय्ता व ल्यासे ल्यामहोपिन्ता स्काउटय् दुथ्याकः अभिगु शारीरिक, मानसिक व बौद्धिक विकास याडः देया विकासया ज्याखय् दुथ्याकय्ता स्काउट हदाय्चवडः ज्या साडः च्वंगु खाँ ब्याकसे बवनय् कुथि नं अनिवार्य स्काउट कक्षा चाय्के फःसा अनुशासित बवनामिपुं बवलानिगु खाँ व्याकः दिल ।

स्वप नगरपालिकां यागु लुमुगु लसकुसता सुभाय देछासे वयकलं स्काउट पाखं थ वं थः या भावना बवलाडः क्वातुगु समाज दय्केता गवाहाली जुइगु खाँ काडः दिल ।

औपचारिक ज्या इवः लिपा प्रमुख प्रजापति जुं स्वप नगरपालिकाया पिथनात उपहार काथं लःल्हाडः दिल ।

स्काउट प्रतिनिधि पुचलय् नेपाल, बंगलादेश, कम्बोडिया, चीन, फिजी, भारत, जापान, मलेसिया, माल्दिभ्स, श्रीलङ्का, थाइल्याण्ड, भियतनाम नपांया प्रतिनिधिपुं दुथ्याकः भःगु खः ।

## अछाम कमलबजार नगरपालिकाया प्रमुख ढकाल ख्वप नगरपालिकाय्

चैत्र १४ गते

ख्वप नगरपालिकाया प्रमुख सुनिल प्रजापति जु नपां अछाम कमल बजार नगरपालिकाया प्रमुख यज्ञप्रसाद ढकालं नपालाडः दिल । वयकता प्रमुख प्रजापति जुं खादा व तका तपुली पुइकः लसकुस याडः दिल ।

उगु इवल्य प्रमुख प्रजापति जुं नगरपालिकाया विशेषता काडः दिसे ख्वप व ख्वपय् च्वडः च्वंपू मन्तयता अःपुकः स्वास्थ्य सेवा ब्रियता १०० गू शय्याया ख्वप अस्पताल चाय्कागु, ल्यासे ल्याम्हो पिन्ता लाहातय ज्या दैगु तालिमत बियो च्वडागु नपां ख्वपया विकास निर्माण उपभोक्ता समिति पाखं याडः वयागु खाँब्याकः दिल ।

अथेहे कमलबजार नगरपालिकाया प्रमुख ढकाल जुं ख्वप नगरपालिकां याडः च्वंगु शिक्षा, स्वास्थ्य व विकास निर्माणया ज्या इवः त स्वयो सिइकेगु मति ज्वडः वयागु खाँ ब्याकसे ख्वप दे अः देशया दकलय बांलागू नगर खः धायोदिल ।

पहाडी लागाय् लागू कमल बजार नगरपालिकाय् पर्यटक, कृषि व जडिवुटीया अपलं सम्भावना दःगु खाँ ब्याकसे स्थानीय



तहलं शिक्षा व स्वास्थ्य खय् बांलाक ज्या याय् फःसा जनताता अपलं भिंजुइगु व अःपुइगु खाँ काडः दिल ।

नपालाय् धुक प्रमुख प्रजापति जुं ख्वप नगरपालिकाया पिथनात नगरप्रमुख ढकालता लः लहाडः द्यगु खःसा उपप्रमुख रजनी जोशी व प्रमुख प्रशासकीय अधिकृत कृष्ण गिरी नं नपां दःगु जुल ।

## ख्वप नगरपालिकाया सेवानिवृत कर्मचारीपिन्ता हना ज्या

चैत्र १६ गते

नेपाल मजदुर किसान पार्टीया नायो भाजु नारायण मान बिजुक्छें (रोहित) जुं ख्वप नगरपालिकाय् ३० दा या सेवा पूर्वांकपुं व सेवा निवृत कर्मचारी पिन्ता विहिवार छगू ज्या इवः यासे लसहना पौ व हना पौ लः लहाडः दिल ।

नेपाल नगरपालिका कर्मचारी एशोसियसन अफ नगरपालिका समितिया ग्वसालय जूगु उगु ज्या इवः सं वयकलं धेबा कमेयाय्गु मतिं ज्या सानिपुं कर्मचारी पिसं संस्थाता भिंयाय्गु स्वयो थःगु जक भिं स्वइगु खाँ कुल दिसे कर्मचारी पिन्के नैतिकता व इमानदारिता मद्यकः मगा धायो दिसे वयकलं सेवा निवृत कर्मचारीपिसं स्वस्थ व सक्रिय जीवन ज्वडः म्वायता अध्ययनता बः ब्यू ब्यू राजनीतिक रूपं सक्रिय जुयमः धायोदिल ।

वयकलं ज्या मसांसे सुंक च्वनिगु निष्क्रिय जीवनं ल्वय जक ब्वनिगुलिं सेवा निवृत पिसं थःगु ल्यं दःगु जीवनता प्रगतिशील काथं ह्छ्यायता घ्वासा ब्रियो दिल नपां इमानदार व भिंपुं राजनीतिक कार्यकर्ता पिसं थःगु नितिं मखुसें समाजया नितिं ज्या याइगु खाँ

ब्याक दिल । समाजवादी व्यवस्था व पुँजीवादी व्यवस्थाय् छु पा धाय्गु खाँकाडः दिसे वयकलं समाजवादी व्यवस्थाय् कर्मचारी पिनिगु नय्गु, च्वनय्गु व मःगु सुविधायो नितिं राज्यं हे व्यवस्था याइगु व समाजवादी देया कर्मचारीपुं देश व समाजयानितिं ह्ज्याइपुं व लगय् जुइपू जुई धायो दिल ।

ज्या इवः सं ख्वप नगरपालिकाया प्रमुख सुनिल प्रजापति जुं जनप्रतिनिधि, कर्मचारी व स्थानीय जनता छप्पा छधि जुयो ज्या सां गुलिं नगरपालिकां न्ह्यागुं ज्या तः लाक याय् फःगु खः धायो दिल ।

वित्तीय अनुशासन, सुशासन व कर्मचारी प्रशासन, बांलागू संस्था लिपाथ्यं ल्यडः च्वनिगु व तः लाइगु खाँ ब्याकसे वयकलं राजनीतिक व्यवस्था बांलासा देश व्यवस्थित काथं ह्ज्याइ धायोदिल ।

नेपालय् देसी सः कारखाना चाय्केगुलिं नेपःया सरकारं मति हे मतःगु खाँ कुल दिसे वयकलं नेपः थःगु तुतिखय् दानय् फय्केगु खःसा कृषि पर्यटन लागायो विकास व व्यवस्थापनय् सरकारं

## सच्छिद्व न्हयगूगु स्वप पौ, बःछि पौ(पाक्षिक)



व लबसिं जुइगुलिं थुगु ब्यवस्थां देयाता भिं मयाइगु खाँ काड दिल् ।

प्रदेश सरकार अखयला थखयला मद्यो च्वंगु व विकृतिया खाँ कुल दिसे वयकलं धायोदिल् राजनीतिसं महिलात अपलं दुश्याकयता नेपाल क्रान्तिकारी महिलासंघं मदिव्क ज्यासाड नैपुं मिसातयता छपाछधी याडः वयो च्वंगु खाँब्याकसे चैत्र २४ व २५ गते चितवनय् नेत्रामसंघया राष्ट्रिय सम्मेलन तःलाकयता ब्वति कायो दिसे आर्थिक, नैतिक, भौतिक ग्वाहाली नं फ्वडः दिल् ।

ख्वप नगरपालिकाया प्रमुख प्रशासकीय अधिकृत कृष्ण गिरी जुं सेवा निवृत कर्मचारी पिसं थःकय् दःगु पेशागत ज्ञान व सीप समाज

ध्यान तयमः धायो दिल् ।

अवकास कायगु दिन थ्यनिथें च्वंपुं कर्मचारी पिसं न्हूँ न्हूंगु खाँ सियकेगु, सय्केगुलि जुयो स्वस्थ व सक्रिय जीवन न्ह्याकयगुलि विचःयाय्मः धायोदिसे वयकलं सरकारता अजनं बल्लाकयगु मतिं ख्वप नगरपालिकां शिक्षा व स्वास्थ्यता हृदायतयो दांकः भिंकः बांलाक सेवा ब्रियगुलि बः ब्रियो वयागु खाँ काडः दिल् ।

अथेहे वागमती प्रदेशया दुजः सृजना सैजुं सेवा निवृत जुयो द्यूपुं कर्मचारीपिन्ता लसय् हांसे वयकपिनिगु जीवन अजनं देश व समाजया भिज्याखय् अभ्र हज्याय् फय्केमः धायोदिल् ।

जनताया सेवाखय् निःस्वार्थ भावं देशां देछीया कर्मचारी पिसं ज्या सांगु जूसा देया ख्वः चकानिगु खाँ ब्याकसे वयकलं सार्वजनिक संस्थाय् जुयो च्वंगु नीतिगत भ्रष्टाचारं याडः हे दे भन भन लिपा लाडः च्वंगु खाँ काडः दिल् ।

पुँजीवादी व्यवस्था देश व समाजता भन भन भ्रष्ट यायां यंक च्वंगु खाँ कुलदिसे वयकलं पुँजीवादी व्यवस्था थः हे ब्यक्तिवादी

विकासया लागिं छ्यलयता धायोदिसे नेपाल सरकारं हःगु कर्मचारी पिनिगु योगदानया लिधंसाय सामाजिक सुरक्षा कार्यक्रमं कर्मचारीपिन्ता भिं याइगु धायो दिल् ।

नेपाल नगरपालिका कर्मचारी ऐशोसियसन भक्तपुर नगरपालिका समितिया नायो गौतम प्रसाद लासिवं २०६७ साल निसें २०७९ सालतक ख्वप नगरपालिका सेवा निवृत कर्मचारी पिनिगु हानय् ज्या जुगु खाँ ब्याकसे कर्मचारी पिनिगु क्षमता अप्वय्केता थी थी तालिमत न्ह्याकय्मः धायो दिल् ।

उगु ज्या इवः सं ने.न.क.ए. भक्तपुर नगरपालिका समितिया दुजः गणेशलाल फौजु व रामकृष्ण प्रजापतिं नं न्वचु तयो द्युगु खः । वहे इवलय् ज्या इवः या मू पाहाँ बिजुकुछें जुं ख्वप नगरपालिका कर्मचारी ऐशोसियसनं पिकःगु २०८० सालया भिते पात्रो सार्वजनिकरण याड दिल् । उगु ज्या इवःसं ख्वप नगरपालिकाय् ३० दा सेवा याय्धुं १७ म्हा व सेवा निवृत जुपुं ९१ म्हा कर्मचारी पिन्ता लसः हना पौ व हना पौ लःल्हाड दिल् ।

## स्वास्थ्य शिविर

ख्वप नगरपालिका वडा नं ३ या ग्वसालय दुरुप्वः व मचाछें या क्यान्सरया शिविर चैत्र १४ गते जुल ।

अथेहे चैत्र १८ गते ख्वप नगरपालिका वडा नं ४ या ग्वसालय शनिबार दुरुप्वः व मचाछेंया क्यान्सर शिविर जुल ।



## प्रगतिशील भजनया धिं धिं बल्ला

चैत्र १७ गते



“पखालि सिर्जेको सम्पत्ति. हाम्रो कला र संस्कृति”

खप नगरपालिकाया गवसालय खप नगर ब्यागु प्रगतिशील भजनया धिं धिं बल्ला शुक्रवार अ्याली याडः जुल ।

खप नगरपालिकाया प्रमुख सुनिल प्रजापतिया न्हयलुवाय् धिं धिं बल्लाया अ्याली खप नगरपालिका वडा नं ९ दतात्रयं व उप प्रमुख रजनी जोशीया न्हयलुवाय् खप नगरपालिका वडा नं १ इनागः निसैं यासे खप नगरपालिकाया वडा नं १ निसैं ५ वडा तक, इनागालं न्ह्याकः वडा नं ६ निसैं १० वडाया अ्याली दतात्रयं न्ह्याक ज्या इवः जुइगु थाय् खप नगरपालिका वडा नं ५ खलाँय् थ्यंकः सभा जूगु जुल ।

ज्या इवः उलेज्या याडः दिसे प्रमुख प्रजापतिजुं जनताया भावना कः घाडः प्रगतिशील भजन प्रतियोगिता या धिं धिं बल्ला याडागु खाँ ब्याकसे थुकी भजन नपां साहित्य, कला व संस्कृतिनपां स्वाडः वगु विषय खः धायोदिल ।

प्रगतिशील साहित्यया खाँ कुल दिसे वयकलं सांस्कृतिक क्रान्तिकाथं भजन म्यैं हछ्याय् फःसा अपलं मनूत क्रियाशील जुइगु खाँ ब्याकसे क्रान्तिकारी साहित्य पाखं समाजता हछ्याय्गु खप नगरपालिकाया तातुना खः धायो दिल ।

अथेहे उप-प्रमुख रजनी जोशी खप देता सांस्कृतिक केन्द्रकाथं हछ्याय्ता सांस्कृतिक विधाया धिं धिं बल्ला यायमःगु खाँ कुलदिसे न्हूगु पुस्ताता भीगु संस्कृति, संस्कारत स्यं स्यं म्वाकः ल्यंक तय्मःगु थौया इलं फ्वडः चवंगु खाँ ब्याक दिल ।

खप नगरपालिका वडा नं ९ या वडाध्यक्ष रबिन्द्र ज्याख्व नं न्वचुतयो द्यूगु उगु धिं धिं बल्लासं ४०थ्व भजन पुचः लं व्वतिकःगु जुल । न्हिच्छीतक थी थी पुचःया प्रगतिशील भजन न्यं न्यं बहनी याय लिच्चः न्यंकः तः लागु पुचःता हानय् बहम्हा श्रद्धेय नेता नेपाल मजदुर किसान पार्टीया नायो भाजु नारायणमान बिजुक्छैं जुं सिरपा लःल्हाडः द्यूगु जुल ।

उगु धिं धिं बल्ला सं चण्डी भगवती राम भजन मण्डल न्हाप, पाताल गणेश भजन मण्डल ल्यू, शुभप्रभात राम भजन मण्डल ल्यू या ल्यू, इन्द्रायणी भजन मण्डल व बाराही अजिमा भजन खलंः हपाः सिरपा त्याकगु खः ।

अथेहे वाद्य वादन पाख्य् खप नगरपालिका (४) पाताल गणेश भजन मण्डल या महेन्द्र सिंख्वाल व म्ये हालय्गु (गायन) पाख्य् खप नगरपालिका ३ या इन्द्रायणी भजन मण्डलया निरुता



गोरा तः लागू खः ।

मू पाहाँ नेमकिपाया नायो भाजु बिजुकुँ जुं कला संस्कृति मनूया जीवन पद्धती नपां स्वापु दःगु न्हयक काथं जुयो च्वंगु खौं व्याकसे भजनया लिधंसां नं समाजय् ह्यूपाहयता व जनता ग्वाकय्गु ज्याखय् हज्यायता घ्वाडः दिसे वयकलं प्रगतिशील भजन पाखं देया इतिहास ब्वय्गु ज्या जुइगुलिं जनताया पक्ष साहित्य च्वय्मः धायोदिल ।

साहित्यया लिधंसाय् न्हंगु पुस्ताता भिंगुलाय् यंकय् फैगु खौं व्याकसे वयकलं जनताता ग्वाकः छप्पा छधि याय्फैगुलिं थजगु ज्या मदिकक याडः यंकय् मः धायोदिल ।

ज्या इवः या सभाया नायो नपां ख्वप नगरपारिकाया प्रमुख सुनिल प्रजापति जुं प्रगतिशील भजन धिंधिं बल्लाया मू तातुना जनताया सामाजिक व राजनीतिक चेतनास्तर च्वछाय्गु, अन्यायया विरोध याडः समाजय् ह्यूपा ह्यूगु खः धायोदिल ।

साहित्य व संस्कृतिया लिधंसाय् समाजय् ह्यूपा ह्यूफः धाय्गु मान्यतां थुगु धिंधिं बल्लाता बः बियो वयागु खौं व्याकसे वयकलं नगरपालिकाया ब्वनाय् ब्वति कायो द्यूपुं सकलसिता सुभाय् देछायो दिल ।

ज्या इवःसं क्वः छियगु पुचः पाखं जनकवि चन्द्रबहादुर उलक, युवा कवि दामोदर सुवाल, प्रगतिशील सांस्कृतिक भजन धिंधिं बल्ला पुचःया कजि नपां ख्वप नगरपालिका वडा नं ९या

वडाध्यक्ष रविन्द्र ज्याख्वः व दुजः उकेश कवापिसं धिंधिं बल्ला यायमःगु, थुकिया तातुना व नियमत काड द्यूगु खः ।

थुगु धिंधिंबल्लाखय् न्हाप लागू पुचःता निडाद्व तका दां, मादल छगः, तबला छज्वः, तिं छु छज्वः, झ्याली छज्वः, ल्यूलागु पुचःता नीद्वतका दां, मादल छगः, तिं छु छज्वः, झ्याली छज्वः, ल्यूया ल्यू लागू पुचः ता हिडाद्वतका दां, मादल छगः, तिंछु छजु, हपा, सिरपा त्याकपुं भजन पुचः ता हिद्वतका दां नपां मादल छगः, झ्याली छज्वः, सिरपा ब्यूगु जुल । नपां धिंधिं बल्ला सं बांलाक म्ये हःम्हासिता डाद्वतका दां व बालाम्हा बाद्य वादकता नं डाद्वतका दां ब्यूगुखःसा दुथ्यापुं पुचः ता खाजा खर्च धायो नीडास तका दां ब्यूगु जुल ।

ज्या इवः सं उप प्रमुख रजनी जोशी जुं ल्य ज्या पुचः या दुजः पूं चन्द्र बहादुर उलक, बद्री नारायण ताम्राकार, बिष्णु बहादुर मानन्धर, पुष्पलाल सुजखु, ओम प्रकाश श्रेष्ठ, दामोदर सुवाल व इन्दिरा लाछिमस्यूपिन्ता मतिनाया चिं नपां लयता पौ लः ल्हाड द्यूगु खः ।

नगर प्रमुख प्रजापति जुं धिंधिं बल्लासं दुतिपुं पुचःतयता दुतिंगुया दसिपौ व मादल छगः छगः बियो द्यूगु जुल । नपां वयकलं उलेज्या न्यालीसं दुतिपुं बाजा खलः ता सुभाय् पौ लः ल्हाड द्यूगु खःसा ख्वप नगरपालिकाया प्रमुख प्रशासकीय अधिकृत कृष्ण गिरी जुं सुभाय देछायो द्यूगु खः ।

## भक्तपुर घरेलू उत्पादन मेला

चैत्र १८ गते



ख्वप नगरपालिकाया गवसालय स्थानीय उत्पादन पर्यटन प्रवर्द्धन याय्गु तातुडः नेन्हूयंक जुइगु 'भक्तपुर घरेलू उत्पादन मेला' या ज्या इवः जुल । ख्वपया नासमना व तालाक्वय् चैत्र १८ व १९ गते नेन्हू यंक जुइगु उगु मेलाया उलेज्या नेपाल मजदुर किसान पार्टीया नायो भाजु नारायण मान बिजुक्छे जु या मू पाहाँलय् ख्वप नगरपालिका वडा नं ३ नासमना त्वाल्य जुल ।

उगु ज्या इवः सं वयकलं भीगु देशय् हे उत्पादन यागु घरेलू उत्पादन सकलसिनं न्याडः छ्यलय्ता विशेष इनाप याडः दिसे स्थानीय उत्पादन पर्यटन विकासय् नं गवहली जुइगु खाँ ब्याक दिल ।

भक्तपुर घरेलू उत्पादन मेला तः लाय्म, धायोदिसे वयकलं दे थःगु तुतिखय् दानय् फय्केता स्वदेशी उत्पादन बल्लाकय् मः धायो दिल ।

ज्या इवः सं ख्वप नगरपालिकाया प्रमुख सुनिल प्रजापति जुं घरेलू उद्योग दे हछ्याय्गु लिधंसा खः धायो दिसे थजगु ज्या इवःखं पर्यटकतय्ता सालय् फैगु, न्हूँ न्हूँगु ज्या याड यक्वसिता ज्या दैगु, थःगु तुतिखय दानय् फैगु नपां देया व्यापारघाटा नं म्हवः याय् फैगु खाँ ब्याकः दिल ।

लसकुस न्वचू तयो दिसे ख्वप नगरपालिका वडा नं ३ या वडाध्यक्ष राजकृष्ण गोरां ख्वपया थः गु हे उत्पादनत ब्वय फैगुलिं थजगु मेला याय्मः गु खाँ ब्याकसे मेला स्वयो दियता इनाप याडः दिल ।

अथेहे वडा नं ९ या वडाध्यक्ष रबिन्द्र ज्याख्वं ख्वप नगरपालिकां इलय ब्यलय मेला व महोत्सवया गवसः गवयो वयो च्वंगु खाँ कुल दिसे भीसं भीगु थाय्या उत्पादनता च्वछाय्मः धायोदिल ।

नेन्हूतक न्हयाइगु उगु मेलाय् ख्वपया थःथाय् उत्पादन जुगु वस्तुत, परम्परागत घरेलू उत्पादनं पिकःगु वस्तुत, काष्ठकला, धातुकला व प्रस्तरकलात नपां हस्तकलाया सामानत, नेवारी नसा ज्वलंत, नपां सांस्कृतिक प्रस्तुति नं दैगु खः ।

स्थानीय उत्पादन पर्यटन त अपलं दुकाय्गु तातुड भक्तपुर घरेलू उद्योग व साना उद्योग संघ व

पर्यटन विकास समितिया मंकः गवसालय जगू उगु मेलाया ज्याली उलेज्या ख्वप नगरपालिकाया प्रमुख सुनिल प्रजापति जुं न्ह्यलुवा जुसे ख्वप नगर वडा नं ८ जेलाँ त्वालं न्ह्याडः दतात्रय, सलाँगणेद्यो, नागपूखु महालक्ष्मी भोलाछेँ, तुछिमला, तुलाछेँ, त्रिपुरसुन्दरी, दरवार लागा, खाँमा, इटाछेँ, बसपार्क, भार्वाचो, तेखापुखु, वंशगोपाल जुयो नासमना थयंकः उलेज्या जगू खः ।

उलेज्या धुंक, ज्याइवः या मू पाहाँ व पाहाँ पुं नासमना व तालाक्वय् जुगू भक्तपुर घरेलू उत्पादन मेला स्वयो द्यगु खः ।



उगु मेला सातिखुनुं नेपाल मजदुर किसान पार्टीया छ्याञ्जे नपां संघीय सांसद प्रेमसुवालाया मू पाहाँलय् ख्वप नगरपालिकाया प्रमुख सुनिल प्रजापतिया विशेष पाहाँलय् सांस्कृतिक ज्याइवः नपां क्वचगु खः ।

## ६६कगु सहकारी दिवस

चैत्र २० गते

ख्वप नगरपालिकाया प्रमुख सुनिल प्रजापतिया मू पाहाँलय ६६ कगु सहकारी दिवसया लसताय नगर दुनय चाय्कः तःगु सहकारी संस्थाया प्रतिनिधिपुं मुंकः सोमवार छगू प्रवचन ज्या इवः जुल ।

ज्या इवः सं मू पाहाँ प्रजापति जुं ख्वपय् चाय्कतःगु सहकारी संस्था समुदायता भिं जुइगु बां बां लागू ज्या याडः वयो च्वंगु दसु पिब्वयो दिसे समाजता बांलाकः भिंकः तयगु जिम्मा सहकारी संस्था यायगु नं खः धायोदिसे इलय् ब्यलय् स्वास्थ्य शिविर चाय्कः नपां सुचुकुचु याडः तय्मः धायो दिल ।

स्थानीय तह नपां मंकः कुतलय सहकारी संस्थात हज्यासा थायथासय् बांलाड मितब्ययी जुइगु खाँ ब्याकसे वयकलं ज्या साडः नैपुं क्वयया वर्गतानं राजनीतिक व सांस्कृतिक रूपं ग्वाकः छपा छधियाड यंकयगु ज्याखय् नं सहकारी संस्था विचः याय्मः धायोदिल ।

वचतकर्ता पिनिगु धेबा ज्वडः सहकारी सञ्चालकपुं बिसे वानयगु ज्या जुयो च्वंगुली सतर्क यासे वयकलं ख्वप नगरपालिकां ख्वप नगर दुनय चाय्क तःगु सहकारीया बारे वयो च्वंगु खाँयाता कायो स्वापु दःगु सहकारीया पदाधिकारीपुं व वचतकर्तात मुंकः मंकः बैठक तयो समस्या ज्यंकयगु कुतः जुयो च्वंगु खाँ नं काडः दिल ।

वयकलं सहकारी संस्थाय् मुनय् हःगु धेबा स्थानीय स्रोत व साधन छ्यलिगु काथंया छ्यै छैगु थासय् छ्यलयमः धायो दिसे ख्वप नगरपालिकां इलय् ब्यलय सहकारी संस्थाया अनुगमन याडः मः काथंया निर्देशन नपां सहकारी कःमिपिन्ता 'लेखा तालिम' वियमः धायो दिल ।

ख्वप नगरपालिकाया उप-प्रमुख रजनी जोशी समाजय् म्हवचा जक आम्दानी दःपुं वर्गता थाकाय्गु मतिं सहकारी संस्था ज्या सानय् मःगु खाँब्याकसे, समाजय् विकृति न्हांकः ई काथंया तालिम नपां ज्याइवः त न्ह्याकय् मःधायो दिल ।



सहकारी समितिया कजि वडा नं २ या वडाध्यक्ष हरि प्रसाद बासुकलां सहकारीया मूल्य मान्यता काथं हज्याड च्वंगु समुदायया लिधंसाया चाय्कः तःगु सहकारी जक जनताया भिं याइगुलिं वचतकर्ता सचेत जुयमः धायोदिल ।

अथेहे भक्तपुर जिल्ला वचत संघया नायो कृष्ण गोविन्द लाखां सहकारी संस्थाया ऐन, नियम व सुशासनया खाँ कुल दिलसा वडा नं ७ या दुजः हरिरत्न गोर्खाली, ख्वप नगरपालिकाया प्रमुख प्रशासकीय अधिकृत कृष्ण गिरी व ५ वडाया वडा दुजः नारायण प्रसाद त्वानाबासुं नं सहकारी संस्थाया ज्या, कर्तब्य व अधिकारया खाँ कुलदिल ।

इनाप

ख्वप नगरपालिका पाखं पिथाड च्वंगु ख्वप पौ बः छि पौ खय् बांलागु च्वसु त बियो ग्वाहाली याड दिसे । उगु रचनाया ल्य ज्या याड पारिश्रमिक बियगु खाँ ख्वप नगरपालिकाया २०७७ श्रावण २६ गते च्वंगु बैठकं क्वः छ्यगु खाँ ब्याक च्वडा ।

सम्पादक  
ख्वप पौ

## आदर निकेतनय् बुहाबुहीपिनिगु सेवा जुइगु विश्वास

चैत्र २१ गते



नेपाल मजदुर किसान पार्टीया नायो भाजु नपां वरिष्ठ राजनीतिज्ञ नारायण मान बिजुक्छें (रोहित) जुं 'भक्तपुर बचत व ऋण सहकारी सांस्थाया कजिलय् च्वंगु 'भक्तपुर आदर निकेतन' या भवन सोमवार छगू ज्या इवः सं उलेज्या याडः दिल । सलंस बुहा बुहीपुं भःगु बाँसुरी व बेला (विणा) या धुनय् उलेज्या जुगु उगु समारोहसं नायो भाजु बिजुक्छें जुं 'भक्तपुर साकोस' पला न्ह्याकगु बांलागू ज्या मे मेगु संघ, संस्था व तहं याःसा नेपः मि पिनिगु सेवा जुइगु खाँ ब्याकसे थः वं थवय् मिलय् जुयो, छप्पा जुयो ग्वाहाली याः सा समाजयवैगु न्ह्याथिन्योगुः पंगः नं चिइके फँगु बिचः प्वंक दिल । वयकलं शिशुशाला, मचाक्यवः, वनयकुथि, कलेज निःस्वासे मचातय्गु सुरक्षा, वनामिपिसं दांकः भिंकः बांलागु शिक्षा काय् फँगु नपां मचात स्वयम्वाली वलय् मां व्वापिसं मेथाय् ज्या सानय् दै धायोदिल ।

मचा बुइकिगु (प्रसुतिगृह) अस्पतालं मिसातय्गु सेवा याथें आदर निकेतनं बुहाबुही पिनिगु सेवा जुइगु विश्वास प्वंकसे नायो भाजु बिजुक्छें जुं तरकारी व जाकी हे भारतं न्याडः ह्यो च्वंगुलि चिन्ता प्वंकसे वयकलं भीगु देशय् हे गाक्क अन्न सय्के फःसा खाद्यान्न (नसा) खय् भी थःगु तुतिखय् दानय् फँगु धायो दिसे गुकिं भी कतया भरय् म्वाय् मालि मखु अलय् भीगु धेबा भी थाय् हे लाड दे हज्याकय्ता ग्वाहाली जुइ धायो दिल ।

छुं नं इलय भारतं अन्न छोयो महः सा वा नाकाबन्दी यासा जनतां तस्कं दुःख-कष्ट नइगुलिं बुँज्या याडः अन्न अपलं सय्केता न्हँगु पुस्ताता नं बुँज्या याकेता घ्वासा बियमः गु खायँ बः बियो दिसे वयकलं हे छँ ज्यासानिपुं मिसात (गृहिणी) पिन्ता छँ या व्यवहार व न्ह्यान्हिथं याय्मःगु ज्याया तालिम, ल्यासे ल्याम्होपिन्ता थी थी लाहातय्, ज्या दँगु तालिम, वियमःगु नपां थाकालिपुं जेष्ठ नागरिकपिन्ता विज्ञ डाक्टर पिनि पाखं संय्कः थुइकः बियो च्वनय्मः धायोदिल ।

वयकलं मुडः तःगु धेवा बैडकय् मुनय्गु मखुसँ खँ छँगु थासय् लाय्काथं छयलय्मः, लाहातय् ज्या दय्क समुदायया लिधंसाय् सहकारी संस्थाय् मुनय् मः धायोदिल ।

मनुत बुसानिसें मसितलय्तक याय् मःगु बिचः व मेमेगु ज्या सहकारी संस्था व स्थानीय तहं याय्मःगु खाँ ब्याकसे वयकलं थाकालिपुं जेष्ठ नागरिकपिसं न्हँगु पुस्ताता थःथःगु अनुभव, सीप, काडः तकल धःसा अनुशासित व भिंपुं नागरिकत ब्वलांकय्ता अःपुई धायो दिल ।

ख्वप नगरपालिकाया प्रमुख सुनिल प्रजापति जुं ताः ई निसें समाजय् भिंगु, ज्या याडः योगदान याडः भःपुं मनुतय्ता हानय् ज्या याय्मःगु खाँ ब्याकसे धेबाखय् जक स्वइपुं, बिचः याइपुं, लहिडः पालनपोषण याइपुं, मानय् याइपुं मनुत मदयो थाकालिपुं जेष्ठ नागरिकपिनिगु जीवन कष्ट नयो हाडः च्वंगु खाँ कुल दिसे न्ह्या बाज्यापिसं तयोतःगु दत्त अः छय्मचाया पालय् चट्ट याइगु जुयो वगुलि चिन्ता प्वंकसे वयकलं भीगुलि लिइमलाक फःगु ज्या याडः जुय फँगु उलि हे भीगु जीवन स्वस्थय् जुयो आयु नं ताः हाइ धायो दिल ।

स्वस्थ समाज दय्केगु मतिं ख्वप नगरपालिका व वडा-वडाय् थी थी स्वास्थ्य शिविरत ततं वयागु खाँ ब्याकसे वयकलं फुक्क नागरिकपुं शिक्षित, स स्यु पुं सचेत नागरिक जुयो छप्पा छधिजुयो आदर्श समाज वा ब्वस्यलागू समाज निः स्वानय्ता ग्वाहाली जुइगु विश्वास प्वंक दिल ।

समस्या नपां ज्यंकय्गु लाँपुं नं दँगु खाँ ब्याकसे वयकलं भीसं मुडः तयागु धेबा भीगु हे जीवन पढ्तिखय् छयलय् मः धायो दिल ।

ख्वप जिल्लाया सहायक प्रमुख जिल्ला अधिकारी माधव शर्मा सरकारं याय्मःगु ज्या सहकारी संस्थां आदर निकेतन चाय्कः थः मनं सामाजिक दायित्व कृब्यगु ब्वस्यलागु ज्या खः धायो दिल ।

वयकलं आदर निकेतन चाय्क समाजया सेवा याथें देशय् ह्यूप्पा ह्युतानं स्थानीय तह व सहकारीया ध्यान वानय्मः धायोदिल ।

ख्वप नगरपालिका वडा नं ९ या वडाध्यक्ष रविन्द्र ज्याख्वं जुं नं आदर निकेतन बांलाक न्ह्याकः यंकय् फय्म धायोदिसे बुहाबुही (ज्याथ जिथी) पिनिगु जीवन नं अःपुक हानय्ता इलय् ब्यलय् बांलागु सल्लाह बियो च्वनय्मः धायो दिल ।

भक्तपुर जिल्ला बचत व सहकारी संस्थायानायो कृष्ण गोविन्द लाखा जुं सहकारी संस्थाया जिम्मेवारी धेबा काल बिल जक मखुसँ सामाजिक सेवा नं खः थुगु आदर निकेतन चाय्कगु छगू उकिया दसु खः धायो दिल ।

बैंक व फाइनेन्सं सामाजिक सेवा मयाइगु विचः प्वंकसे वयकलं लोभय् मच्वंसँ सहकारी संस्था व जिम्मेवार मनुतजक सिइकः दुजःजुयमः धायोदिल ।

भक्तपुर साकोसया नायो बलराम प्रजापतिया सभानायोलय् जूगु उगु ज्या इवः सं छयाञ्जे लक्ष्मी प्रसाद कुसीं आदर निकेतनय् च्वनय् बलय् याय् मःगु नियमत काडः दिलसा दांभारी राम प्रसाद प्रजापतिं भक्तपुर साकोस व आदर निकेतनया ल्या चा पिब्वयो दिल ।

संस्थाया दुजः जगनाथ प्रजापतिं आदर निकेतन छाय् निःस्वानय् माला धाय्गु खाँ काडः दिल ।

## अनलाइन भुक्तानीया तालिम

चैत्र २२ गते

ख्वप नगरपालिकां ख्वप नगरपालिकाया वडा सचिव नपां कर्मचारीपिन्ता अनलाइन भुक्तानी प्रणालीया विषय थुइके बियगु नपां बहालकर व सफाई शुल्क सफ्टवेयरया तालिम बुद्धवार न्ह्याकल । तालिमया औपचारिक उलेज्या याडः दिसे ख्वप नगरपालिकाया प्रमुख सुनिल प्रजापति जुं विकसित देशत सुचं व प्रविधिखय् हज्यागुलिं याडः मथां मथां हज्यागु खाँ ब्याकसे २१ औं शदिंया नागरिकपुं प्रविधियुक्त जुय मफूसा फुक्क लागाय् लिपा लाइगु खाँ ब्याक दिल ।

सूचना प्रविधि मानव जीवनया अभिन्न अङ्ग काथं जुयो च्वंगु इलय् नगरपालिकाय् ज्यासाड, च्वंपू कर्मचारी पिन्ता प्रविधिं जःपुं याडः तय्ता तालिमता बः ब्यू ब्यू वयागु खाँ ब्याकसे वयकलं अनलाइन भुक्तानी अः पुकय्या लागिं थव तालिमं ग्वाहाली जुइगु खाँ



काडः दिल ।

ज्या इवःसं ख्वप नगरपालिका वडा नं २ या वडाध्यक्ष हरिप्रसाद वासुकला व कर शाशखा प्रमुख प्रभावकुमार चालिसें नं न्वचु तयो द्यूगु खः ।

## ला पसःल्यात मुंकल

चैत्र २२ गते

ख्वप नगरपालिका अनुगमन समितिया ग्वसालय नगर प्रमुख सुनिल प्रजापतिया मू पाहाँलय ख्वप नगरपालिकाया सभाकक्षसं बुद्धवार छगू मुंज्या जुल ।



भेलासं प्रमुख प्रजापतिं न्ह्यागु नं खाँ अर्थतन्त्रं क्वः छिइगु लिं अर्थतन्त्रता क्वःथल धःसा दे हे क्वः दैगु खाँ ब्याकः दिल ।

वयकलं ला मियगु ज्या नं अर्थतन्त्र नपां स्वापू दैः गुलिं पिनय्या देशं ला न्याडः हःसा देया धेवा पिनय्वाडः देया आर्थिक अवस्था कमजोर जुजुं वानिगुलि ब्यवसायीपिन्ता अनुदान, सहलियत ऋण बियो, पिनयनं हैगु लाखय् अपलं कर कायो ला खय् थःगु तृतिखय् दानय् फय्के मः धायोदिल ।

ला खय् थःगु तृतिखय् दानय्गु कृतः याबलय् बर्डपफ्लुया

हल्ला याडः भारतया ला न्याकय्गु जः याडः भारतं एकाधिकार पुँजी थः कय् लाकय्गु कुतः याड च्वंगु खाँ नं वयकलं ब्याकः दिल ।

प्रमुख प्रजापति जुं धायोदिल - तरकारीजक २२ अरबया न्याड दुतिंगु तथ्याडक दः गुलिं थःगु तृतिखय् चुयता व्यवसाय ता थाकाय्मः धायो दिल ।

ख्वप नगरपालिकां शिक्षा, स्वास्थ्य, सम्पदा ल्यंकः म्वाकः तयगुलि बः बियो ख्वप देता पर्यटकत छकः मवसं मगागु गन्तव्य थाय् काथं ज्या याडः वयो च्वंगु अथेयाय् फःसा आर्थिक रूपं बल्लाइगु खाँ ब्याकसे वयकलं जनताया आर्थिकस्तर च्वजाय्केता स्थानीय उत्पादन मेला नकतिनि क्वचाय्कागु खाँ ब्याकसे लबया नितिं न्ह्यागुसां याय्गु मति त्वः त इमानदार जुयो व्यवसाय न्ह्याकय्ता सुभावा बियो दिल ।

बजार अनुगमन समितिया कजि नपां वडा नं ३ या वडाध्यक्ष राजकृष्ण गोराया सभानायोलय् जुगु उगु मुंज्यासं लसकुस, अनुगमन समितिया कजि नपां १ वडाया वडाध्यक्ष श्यामकृष्ण खत्री व दुजः पांखया छ्याञ्जे दिलिप कुमार सुवाल, वडा निरीक्षक रामकृष्ण प्रजापति व पशु सेवा कार्यालय ख्वपया पार्वती योज्जन नं न्वचु तयो द्यूगु खः ।

मुंज्यासं कुखुरा व्यवसायी संघ ख्वपया नायो, तुल्लिराम धुख्वां नपां व्यवसायीपिसं लामियगु व्यवसाय दुनय् वगु समस्या नपां अनुगमनया खाँ न्यडः दिल ।

## शासकपुं देश व जनता प्रति जिम्मेवार जुयमः

चैत्र २३ गते

भूगु आस्था पुचःगोल्मढीया ग्वसालय वार्षिक ज्याइवः चवडा गणेद्यो सल्लाघारी जुल । ज्या इवः सं नेपाल मजदुर किसान पार्टीया छ्याञ्जे नपां सङ्घीय सांसद प्रेम सुवालं मिसात सचेत व शिक्षित जुसा समाज हज्याइगु खाँ ब्याकसे न्हापा न्हापा ज्या साडः नैपुं वर्ग्या मिसा तयूता आखः ब्वंक्य् मब्यगु ख्वप नगरपालिकां



ख्वप कलेज चाय्कानिं ज्यापु ज्यामिया मिसा तयसं नं चवय् थ्यक आखः ब्वनय् खांगु खाँ ब्याकसे धुम्रपान याय मज्यगु, फुक्क ल्यासे

ल्याम्हो पुं विदेश्य् वाडः ब्रह्मबुहीपुं जक ल्यं दयो बँ बाँभ जुयो नसा त्वसा नपां विदेशं ह्य मःगु, देसी सः मरुगु नेपः देता भारतया लाहातय् तयो तैगु १९५० या सन्धीथजगु फुक्क सन्धीत खारेज याय् मःगु खाँ काड दिल् । नपां एम सी सी व नागरिकता विधेयकं जनताता भिं मयाइगुलिं विरोध याय् मःगु खाँ ब्याकसे ३३ दा थुख्य् बहुदलीय व्यवस्थाय् सरकारे वांपुं पार्टीत देश व जनता प्रति जवाफदेही मज्जगुलिं थथे जगु खाँ ब्याकः दिल् ।

अथेहे नेमकिपाया केन्द्रीय दुज नपां ख्वप नगरपालिकाया प्रमुख सुनिल प्रजापति जुं पुँजीवादी व्यवस्थाय् जनताता स्वयो पुँजीपति तयूता स्वइगुलिं जनतां दुखः । सिइगु खाँ ब्याकसे जनतां सुख, शान्तिं म्वायगु खः सा समाजवादी व्यवस्था ह्यमः धायो दिसे उगु व्यवस्थाय् ज्या, नसा व चवनय्गु, वासयाय्गु फुक्क अधिकार दै धायोदिल् । अः ख्वप देशय शिक्षा, स्वास्थ्य, कला व संस्कृति, सुचुकुचु बांलाक हज्याक चवडागु खाँ कुलदिसे समाज हज्यायूता राजनीतिक रूपं ग्वाक, जुयमः धायो दिल् ।

भूगु आस्था पुचः या नायो सुनिल ग्वाछाया सभानायोल्ज्यु उगु पुचःया दांभारी गणेश राम रंजितकार नं न्वचुतयो द्यगु खः ।

## बिस्का जात्राया लाँपु स्वःभाल

चैत्र २३ गते

ख्वप नगरपालिकाया प्रमुख सुनिल प्रजापतिया न्हयलुवाय् प्रमुख जिल्ला अधिकारी खगेन्द्रप्रसाद रिजाल, ख्वप नगरपालिकाया वडाध्यक्षपुं रबिन्द्र ज्याख्व(९), उकेश कवां (७), योगेन्द्र मान बिजुकुछे (५) पूर्व वडाध्यक्ष कुमार चवाल, गुथि संस्थान ख्वपया प्रमुख खीमा ओली, सहायक प्र.जि.अ. माधव शर्मा, प्रमुख प्रशासकीय अधिकृत कृष्ण गिरी, प्रहरी प्रशासन नपांया पुचः हनय वयो च्वंगु ख्वपया लोकं ह्वागु विस्का जात्रा शान्तिपूर्ण व्यवस्थित व तस्कं बांलाक डाय्केता जात्रा जुइगु थाय् तः माही, भैलखः व भैलखः लुइगु लाँपुइ भायो स्वयो दिल् । उगु पुचः विस्का जात्रा न्ह्याइगु लाँपुइ मछिंकः पांक तयो तःगु तार, केबुलत गथे दः जक स्वयो दिल् ।

विस्का जात्राया निंतिं भैलखः दय्केगु ज्या मथां न्ह्याकः च्वंगु दः । न्हँगु वर्ष २०८० दु स्वः वइगु नपां २०७९ चैत्र २७ गते निसें सुरु जुइगु ऐतिहासिक व सांस्कृतिक महत्व कः घाड च्याचा गुन्हू तस्कं तःजिक ख्वपय् मानय् याई ।

थ्वनं हाँ जात्रा तःजिक, बांलाक हानयूता जात्रा नपां स्वापु दःपुं मनूत सःत बैठक चवडः मः काथंया खाँ क्वः छिय धुंकगु जुल । नगर प्रमुख सुनिल प्रजापतिया नायोसुई च्वंगु बैठकं उगु भैलखः लुइगु लाँपुया तार, केबुल २०७९ चैत्र २६ गते व्यवस्थित याय्गु खाँ क्वः छ्यगु खः ।



## व्यवस्थित बस्ती दयकेता आवास योजना

चैत्र २३ गते

खप नगरपालिकाया प्रमुख सुनिल प्रजापति जुं खप नगरपालिकां लब नय्ता आवास योजना न्ह्याकगु मखुसें खप देता सुविधां जःगु सहर काथं व्यवस्थित याय्ता नपां व्यवस्थित वस्ती विकास याय्गु मतिं आवास योजना न्ह्याकगु खः धायो दिल ।



बुधवार बहनिथाय् खप नगरपालिका वडा नं २ या ग्वसालय तहां ब्यासी समसामयिक राजनीतिक विषय व खप नगरपालिकां

याडः वयो च्वंगु ज्या इवः या जानकारी बियगु इवल्य प्रमुख प्रजापति जुं उगु बिचः प्वंकः द्यूगु खः ।

वयकलं खप नगरपालिकां शिक्षा, स्वास्थ्य, सम्पदा ल्हवनय-कानय व देया लागि मःपुं जनशक्ति ब्वलांकय्गु ज्या याड वयो च्वंगु खाँ ब्याकसे खप नगरपालिकां नेपाल मजदुर किसान पार्टीया सिद्धान्त काथं ज्या हछ्याड खप देता व्यवस्थित सुविधां जःगु सहर दय्केगु मतिं हज्याड च्वंगु नपां खपया पतीजग्गा ल्यंकः तय्गु ज्याख्य ज्या हछ्याड च्वंगु नं खाँ ब्याकः दिल ।

नगरपालिकां आवास योजना मचाय्कगु जूसा घर जग्गा कारोबारीपिसं किसान तय्के दांकः जग्गा न्याडः किसानतय्ता थाथ् मद्यकः थाड छ्वैगु खाँ कुल दिसे वयकलं खप नगरपालिकां न्ह्याकः च्वंगु आवास योजनाय्गु खाय् वगु जन गुनासो न्यायोचित काथं सम्बोधन याय्गु कुतः जुयो च्वंगु खाँ काडःदिल ।

ज्या इवःसं देको मिबा आवास योजना उपभोक्ता समितिया रविन्द्र खबुर्जा, आसकुमार कोजु, गणेश प्रसाद सुवाल, वडाया दुजपुं श्यामसुन्दर मातां व मञ्जु मैयाँ लाखां नं न्वचु तयो द्यूगु खः ।

## शिक्षा विकास मजुइकः दे हज्याइमखु

चैत्र २५ गते

खप नगरपालिकाया प्रमुख सुनिल प्रजापति जुं शिक्षा हछ्याय मफय्कः दे हमज्याइगु खाँ ब्याकसे संविधान आधारभूत तह अनिवार्य व मावि तगिं निःशुल्क दक व छ्यूसां व्यवहार्य छ्यलय् मफयो च्वंगु खाँ कुल दिल ।

खप नगरपालिका वडा नं ३ वाराही स्थानया महेन्द्र विद्याश्रम या ३८ कगु पलिस्था दिया लसताय् जूगु अभिभावक दिवस, अभिनन्दन ज्याभ्वः नपां दीक्षान्त समारोहसं न्वचुतयो दिसे वयकलं खप नगरपालिकां निजी व सामुदायिक ब्वनय् कुथिया दशवी शैक्षिक गुणस्तर च्वजाय्केता स्वस्थ प्रतिस्पर्धाया निंति नीति हछ्याड च्वडागु खाँ व्याकः दिल ।

अः विदेश केन्द्रित शिक्षां याड नेपःया अपलं ब्वनामिपुं विदेशय् वाडः च्वंगुलिं उकिता पानय्मः धायो दिसे वयकलं बांलापुं व (दक्ष) सःस्युपुं जनशक्ति विदेशय् वांसेलिं नेपःदे हःनय् वानय मफूगु अथे जुयो च्वंसा अजनं भी लिपा लाइगु खाँ काडः दिल ।

ज्याभ्वः सं वडा नं ३ या वडाध्यक्ष राजकृष्ण गोर्रां ब्वनय्कुथिं शिक्षानपां व्यवहारिक ज्ञान ब्यू ब्यू अभिभावक पिनिगु



रचनात्मक सुभावा न्यडः हज्याय्मःधायो दिलसा उगु ज्या भ्वःसं ब्वनय् कुथिया निर्देशक नपां सभाया नायो महेन्द्र मास्के, प्र.अ. अनिल श्रेष्ठ, शिक्षक प्रतिनिधि पद्मराज सुबेदी नं न्वचु तयो द्यूगु खःसा मुपाहाँ व पाहाँपिसं ब्वनय्कुथिया जेष्ठ अभिभावक पिन्ता हानय् ज्या व ब्वनामिपिन्ता दीक्षान्त याडः द्यूगु खः ।

## ‘न्हूगु पुस्ताता सामुहिक भावनां ग्वाकिगु शिक्षा बियम :’

ख्वप नगरपालिका वडा नं. ४ राम मन्दिरया मिनर्वा इङ्गलिस स्कूलया अभिभावक दिवस, दीक्षान्त समारोह व एस.ई.ई. पास जूपुं ब्वनामि पिन्ता बिदाइया ज्या भ्वःसं उलेज्या ख्वप नगरपालिकाया प्रमुख सुनिल प्रजापति जुं चैत्र २५ गते पानसय् मता च्याक याडः दिल ।

वयकलं धेबा कमेयायगु मतिजक तयो ब्वनिपुं ब्वनामिपिसं देश व परिवारता वास्ता मयासैं विदेशय् वानिगु खाँ काडः दिल । वयकलं ख्वपया सम्पदा, कला, संस्कृतिया ज्ञानवियता स्थानीय पाठ्यक्रम दय्क नगरयाफुक्क ब्वनय् कुथि ब्वंकय् बियागु नपां ख्वप नगरपालिकां शिक्षा नपां कासा व सांस्कृतिक ज्याभ्वःता बःबियो ख्वप देता म्वाडः च्वंगु सहर काथं ह्छ्याय्गु कुतः जुयो च्वंगु खाँ ब्याकः दिल ।

न्हूगु पुस्ताता थःजक नय् धायगु भावना त्वतकः सामुहिक भावनांग्वाकः ह्छ्याय्मःगु खाँ ब्याकसे ख्वप देता शैक्षिक केन्द्रकाथं ह्छ्याय्ता निजी व सामुदायिक ब्वनय्कुथिया तःहांगु लाहा दः धायो दिल ।

ज्याभ्वः सं वडा नं. ४ या वडा दुजः कृष्ण सुन्दर प्रजापति जुं वडा पाखं न्ह्याक च्वंगु ज्याभ्वः त ब्वयोदिसे सम्पदा



ल्यंकः म्वाकः तयगु शिक्षा, सुचुकुचु ज्याभ्व सं ब्वनामिपुं दुग्याकः यंकय्मः धायो दिल ।

डा. सत्यनारायण सुवालं कोभिड भ्वलय् भी जलाखाला देशय् खानय् दयो वगुलिं सकल नागरिकपुं सचेत जुयमःगु कोभिड विरुद्धया खोप कायो सुरक्षित जुयमः धायोदिल ।

ब्वनय्कुथिया प्रिन्सिपल राजेन्द्र दुवालं नं न्वचु तयो द्यगु उगु ज्या भ्वःसं एसइइ पास जूपिन्ता बिदाइ व ब्वनामिपिन्ता दीक्षित यागु खः ।

## धौभडेलता लसःहना

चैत्र २५ गते

नेपाल कराते महासंघ ‘ख्वप जिल्ला कराते’ या ग्वसालय् जूगु लसःहना ज्याभ्वः नपां दसि-पौ लःल्हाय्गु ज्या भ्वः नेपाल मजदुर किसान पार्टीया केन्द्रीयदुजः नपां ख्वप नगरपालिकाया प्रमुख सुनिल प्रजापतिया मूपाहाँलय् शुक्रवार त्रिपुरसुन्दरीसं जुल ।



ज्या भ्वःसं प्रमुख प्रजापति जुं नेपाल कराते महासंघय् न्वकु खय् निर्वाचित जुयो द्युम्हा प्रकाश मोहन धौभडेलता लसय हांसै दसिपौ लःल्हाडः दिल । ब्वनय्कुथिया प्रशिक्षक, प्रशिक्षण तालिमय् ब्वतिकःपिन्ता दसिपौ लःल्हाड दिल ।

पदया त्याग, तपस्या, परिश्रम व मेहनतं अःनेपाल कराते

महासंघया न्वकु जुय फःगुलिं लस हांसै राजनीतिखय् पदया नितिं ज्युगु मज्युगु न्ह्यागुनं ज्यायाडः वगुलिं अःदेया स्थिति भनभन क्वम्हूयो वाडः च्वंगु खाँ ब्याकसे पूर्वाधार मदय्क : कासा हमज्याइगु खाँ कुल दिसे लिबाली व देकोचाय् कभर्ड हल दय्कः स्तरोन्नति याडागु खाँ ब्याकः दिल । वयकलं कासाखय् गुलि अप ब्वति काय् फता उलि कासामित हज्याइगु खाँ ब्याकसे ख्वप नगरपालिकां ब्वनय्कुथि ब्यागु कासाया धिं धिं बल्ला याडागु खाँ ब्याकः दिल ।

वयकलं विदेशीया भरय् च्वंसा दे हमज्याइगुलिं भीगु थासय् भीसं हे याय्मः मखुसा श्रीलङ्काया हालत जुयमालिदक सरकारया ध्यान सालः दिल । मभिपुं न्ह्यलुवात हृदायलाडः च्वंगुलिं देश व जनतां दुःख सियो च्वंगु खाँ कुलदिसे उकिं भीसं देश, जनता व समाजया नितिं ज्या सानय् मः धायो दिल ।

ख्वप नगरपालिका वडा नं. ५ या वडाध्यक्ष योगेन्द्रमान बिजुक्छेजुं विकासधाय्गु तः तः ब्यागु लाँ, तः तः खागु छँ जक मखुसैं म्यैं, सङ्गीत, प्याखं, कासात ल्यंकः म्वाकः हज्याय्गु नं खः धायोदिसे कासा आत्मरक्षाया लागिं खः उकीं म्वथाय् म्छ्यलय्ता धायो दिल ।

## सच्छिव न्हयगूगु स्वप पौ, बःखि पौ(पाक्षिक)

नकतिनि ने.क.म. संघय् त्याकः भःम्हा प्रकाश मोहन धौभडेलं सुचुक-सुचुक सय्कागु कराते कासाया प्रशिक्षण ब्यू ब्यू हनय् यंकागु, कासा राजनीतिक भागवण्डां याडः बांलापु मखु थःपुं कासामित विदेशय् ब्वति काय्के छ्वगुलिं नेपालं तःलाकय् मफूगु खाँ कुल दिसे क्वयनिसें म्हेत वपुं कासामिपुं बांलाइगुलिं प्राविधिक रुपं कासाता ह्छ्याय्मः धायोदिल ।

भक्तपुर जिल्ला बक्सिड संघया नायोभाजु रामकृष्ण प्रजापतिं कासाखय् हे जीवन फुक च्वपिसं याडः ख्वपय् कासा हज्याड च्वंगु खाँ ब्याकसे कासाता जीवनया अभिन्न अड्ग याय्मः

धायो दिल । कासा अनुशासन, मित्रता व जागरुकताया लागिं म्हेतिगु नपां थुकिं अन्तर्राष्ट्रिय लायाय् नं नां जाइगु खाँ ब्याक दिल ।

अन्तर्राष्ट्रिय कासामि, रेफ्री, नपां स्यनामि रामशरण त्वातीया सभानायोलय् क्वचःगु उगु ज्या भूवः सं अन्तर्राष्ट्रिय रेफ्री नपां नेपाल कराते महासंघ रेफ्री काउन्सिलया नायो राजेन्द्र कपाली, भक्तपुर किक बक्सिड संघया राजन चित्रकार, करातेया वरिष्ठ प्रशिक्षक रोशन प्रजापति, राधिका देउला, जिल्ला खेलकुद विकास समितिया दिपेन्द्र ब्यांजुपुं नं भगु लि सूर्य लामां नं न्वचु तयो द्गूगु खः ।

## बिस्का जात्राया बैठक

चैत्र २६ गते

ख्वप नगरपालिकाया प्रमुख सुनिल प्रजापतिया नायोसुई कन्हेनिसें न्ह्याइगु ख्वपया ऐतिहासिक बिस्का जात्रा ल्वापु मजुइक शान्तिपूर्वक, तस्कं बांलाक हानय्ता आइतवार नगरपालिकाया सभाकक्षसं सुरक्षा निकायया प्रमुख जुपुं नपां तयारी बैठक जुला । बैठकसं भक्तपुर जिल्लाया प्र.जि.अ. खगेन्द्र प्रसाद रिजाल, ख्वप नगरपालिका वडाध्यक्षपुं रविन्द्र ज्याख्वः (९), योगेन्द्र मान बिजुकुछें (५), उपेन्द्र सुवाल (४) ख्वप नगरपालिकाया प्रमुख प्रशासकीय अधिकृत कृष्ण गिरी, इन्द्र वक्स गणया गणपति श्याम राजा विक्रम थापा, गणपति दिनेश कुमार महता, राष्ट्रिय अनुसन्धान जिल्ला कार्यालय ख्वपया प्रमुख प्रकाश आचार्य, सहायक प्र.जि.अ. माधव प्रसाद शर्माजु पुं भायो द्यगु जुल ।



## बिस्का जात्राया सद्भाव याली

चैत्र २६ गते

ख्वप नगरपालिकाया ग्वसालय चैत्र २७ गते छो क्वहें बिज्याडः न्ह्याकिगु लोकं ह्वागु ऐतिहासिक व सांस्कृतिक बिस्का जात्रा ल्वापु मयासैं, मिलयजुयो, बांलाकः हानय्ता ख्वपया तः माही थौं सद्भाव सभा जुल ।

सभाया मूपाहाँ नेपाल मजदुर किसान पार्टी या छ्याञ्जे नपां संघीय सांसद प्रेम सुवालं जात्रा, पर्व, कला व संस्कृति धाय्गु मानव समाजया विकासया ताकी खः धायोदिसे भी पुर्खा डायुकः त्वःत तकगु जात्रा भीसं बांलाकः भिंकः डाय्केगु भीगु कर्तव्य खः धायोदिल । वयकलं देश विदेशया सकलसिनं सञ्चारया लिधंसाय् स्वइगुलिं जात्रा बांलाक डाय्के मःगु, देशय् अर्थतन्त्र स्यडः च्वंगु इलय अपलं धेबा खर्च याड नखा डाय्के मज्यगु नपां दे थःगु त्तिखय दानय् फय्केता फुककसिनं थःथःगु थासं कुतःयाय्मः धायोदिल ।

ज्या भूवः या सभाया नायो नपां ख्वप नगरपालिकाया प्रमुख सुनिल प्रजापतिजुं बिस्काजात्रा ख्वपया म्हासिइका जुगुलिं जात्रा भव्य व सभ्यकाथं डाय्केता इनाप याडः दिसं स्वापु दःपु

सकल नपां बैठक ततं वयागु खाँ ब्याकसे ख्वपया कला संस्कृतिया विषय न्हंगु पुस्ताता नं थुइके वियता स्थानीय पाठ्यक्रम दयकः ९२ गू ब्वनय् कुथि ब्वंकय् वियागु खाँ काडः दिल ।

अथेहे वडा नं. ५ या वडाध्यक्ष योगेन्द्रमान बिजुकुछें जुं बिस्का जात्रा ख्वपय् तय्गु जक मखुसे सारा संसारं स्वयो च्वनिगुलिं बांलाक डाय्के मः धायो दिल ।

ख्वप जिल्लाया सि.डि.ओ खगेन्द्र प्रसाद रिजालं थुगु जात्रा भीगु गौरवया जात्रा जूगुलिं सकलं मिलय् जुयो बांलाक हानयनु धायो दिसे जात्राखय् म्वःमरुगु ज्या मयाकय्ता सी सी क्यामरां खिचय् याडः अजपिन्ता कारवाही याय्गु खाँ काडः दिल ।

अथेहे गुथि संस्थानया प्रमुख खिमा ओली, वडा नं. ९ या वडाध्यक्ष रविन्द्र ज्याख्वपिसं नं न्वचु तयो द्यगु खः । सभा हाँ दतात्रय त्वालं नगर प्रमुख प्रजापतिया न्हयलुवाय, १ वडाया वडाध्यक्ष श्याम कृष्ण खत्रीया न्हयलुवाय इनागालं न्ह्याकगु सद्भाव यालीसं जनप्रतिनिधि, कर्मचारी, सुरक्षा निकाय थी थी पुचलं ब्वति कःगु खः ।

## स्वास्थ्य कःमि पुं सेवा भावं ज्या सानय् मः

चैत्र २७ गते

ख्वप नगरपालिका पाखं चाय्कः तःगु ख्वप अस्पतालया ग्वसालय, नेपाल मजदुर किसान पार्टीया नायो भाजू नपां वरिष्ठ राजनीतिज्ञ नारायणमान बिजुक्छें (रोहित) ज्यूया मू पाहाँलय ख्वप इञ्जिनियरिङ कलेजया सभाहलय बिस्का जात्रा व न्हूंगु दाँ २०८० या लसताय भिन्तुना काल बिल ज्याइवः जुल ।

मुपाहाँ बिजुक्छें जुं अः देशया अर्थतन्त्र अखय्ला थखय्ला मरुगुया हुनि मध्ये कर्मचारीपुं इमानदार व थःगु पेशाप्रति ध्यान तयो इमानदार जुयो, देशय जनताप्रति समर्पित जुयो ज्या मसांगुलिं खः धायो दिसे ख्वप अस्पतालया स्वास्थ्यकःमि व कर्मचारीपुं थःगु पेशाप्रति लगनशील व इमानदारीपूर्वक देश व जनताया सेवायाय्गु मतिं ज्या सानय् मः धायोदिल ।

वयकलं सरकारं सरकारी अस्पतालत बांलाक चाय्के मफूगुलिं जनतात अकालं सीय् माल च्वंगु खाँ कुलदिसे देशय् उथिग्यंकः विकास याय्या निंतिं छगू छगू प्रदेश व जिल्ला सदरमुकामय् वीर अस्पताल थजगु सुबिधां जःगु अस्पतालत दय्केमःगु खाँ ब्याकसे धाथें सरकारं सरकारी अस्पतालया बांलागु सेवा ब्यूगु खःसा सुं नं थिकय्गु निजी अस्पतालया वानय् मालिगु मखु धायो दिल ।

मू पाहाँ बिजुक्छें जुं जनताया चेतनास्तर थाकाय मफू तलय् स्वास्थ्य सेवासं पंगःत वैगुलिं स्वास्थ्यकःमिपिसं सेवाग्राहीपिसं नाइगु व्यवहार याय्मःगु नपां थःगु लागा तः लाकयता तस्कं मेहनत याय्मःगुखाँ ब्याकसे विदेशी भायनं सय्के फःसा थःगु पेशा नपां च्वयथ्यंकया शिक्षा कायगुली ग्वाहाली जुइगु बिचः प्वंकसे भौतिक परिवर्तन स्वयो सांस्कृतिक परिवर्तन ह्यमः धायो दिल ।

ज्या इवःया सभाया नायो नपां ख्वप नगरपालिका प्रमुख सुनिल प्रजापति जुं स्वयं नगरपालिकां नगरबासी पिनिगु लागिं ख्वप अस्पतालया दांकः भिंकः स्वास्थ्य सेवा बियो वयो च्वंगु, अस्पतालया अंतरंग सेवा नपां ८० तका दामं विशेषज्ञ नपांया १० घौ ओपिडि सेवा, धेबा म्वायक अक्सिजन, न्हियान्हिथं भिडियो एक्सरे थजगु सेवा ब्यूब्यू वयो च्वंगु नपां मथां हे मचा बुइकिगु प्रसुति सेवा चाय्केगु तातुडः हज्याडः च्वंगु खाँ ब्याकः दिल ।

ख्वप अस्पताल चाय्कसानिसें हे संघ व प्रदेश सरकारता सिटी स्क्यान व एम आर आइ मेसिन थजगु स्वास्थ्य उपकरणत



मालादक धाधां वयो च्वडागु अथे नं अः तक मब्यूगु खाँ ब्याकसे वयकलं मः काथंया उपकरणत तां तां अस्पताल हज्याक यंकय्गु खाँ ब्याक दिल ।

देया ल्यासे ल्याम्होपुं विदेशय् वानिगु दायें दायें पतिकं अप्वयो वगुलिं चिन्ता प्वंकसे दायें दायें पतिकं शिक्षाया लागिंजक खरबौं तका दां विदेशय् वाडः च्वंगु खाँ कुल दिसे वयकलं थःगु देशय् दःगु स्रोत साधनत फक्वलं अपः छ्यलः भ्नीगु देशय् हे बांलागु शिक्षा व स्वास्थ्य सेवा वियमः धायोदिल ।

वयकलं न्हिं न्हयस-च्यास मनूयता थुगु आ.व. या च्याला दुनय् ख्वप अस्पतालं देशां देछिया १ लाख व ४२ ट्व स्वयो अपः जनतातय्ता अःपुकः भिंकः स्वास्थ्य सेवा बिय धुंकगु खाँ ब्याकसे धेबा मदयो वास याकय् मफयो च्वंपुं बिरामीपिन्ता स्वयो बिस्कं कोषया ब्यवस्था याडः तयागु खाँ नं ब्याकः दिल ।

ज्या इवः या पाहाँनपां ख्वप नगरपालिकाया उप-प्रमुख रजनी जोशीं नेपाल मजदुर किसान पार्टीया घोषणा-पत्रकाथं ज्या साडः वयो च्वडागु नपां बिस्काजात्रा ख्वपया म्हासिइका पिब्वयो च्वंगु लोकं ह्वागु जात्रा जूगुलिं थुकिता बांलाक हानय्मः धायो दिल ।

ख्वप अस्पतालया निमित्त डाइरेक्टर डा. मजेश प्रताप मल्लं ख्वप अस्पतालंबियो वयो च्वंगु सेवाया खाँ काडः द्यूगु ज्या इवः सं अस्पतालया डा. अमर प्रजापति, डा. रत्न सुन्दर लासिव, स्टाफ नर्स रविना कवां नं न्वचु तयो द्यूगु खः ।

नगरपालिका भ्नीगु हे संस्था खः  
इलयहे करपुल ग्वाहाली याय्नु

## खपदेता ज्ञानविज्ञानया मू थाय् द्युकेगु लिपाथ्यंकया तातुना



खप नगरपालिकाया प्रमुख सुनिल प्रजापतिया मू पाहाँलय साइनिङ्ग स्टुडेन्ट एकेडेमी प्रिस्कूलया दीक्षान्त समारोह व वार्षिक नतिजा वितरण व सांस्कृतिक ब्वज्याया उलेज्या याडः दिसें खपय बन्द हड्तालया लिच्चः मलाइगुलिं खपया ब्वनय्कुथि व कलेजया

## खपया मेलम्चीया नाः इय्ता समभदारी

खप नगरय् थी थी थासय् पाइपलाइन इन्टर कनेक्सन याडः थाय थासय् मेलम्चीया खानेपानी वितरण सुधार याय्गु समभदारी जूगु दः । खप नगरपालिकाया प्रमुख सुनिल प्रजापतिया नायोसुई काठमाडौं उपत्यका खानेपानी ब्यवस्थापन बोर्ड नपां शुक्रबार जूगु बैठकय् उगु खौं क्वः छिडः समभदारी पत्रखय् सहिछाप यागु खः । बैठकय् क्वः छ्यगु खौंतः



- खपया थी थी थासय् त्वनय्गु नाः या समस्या जूगुलिं अःया नाः इय्गु प्रणाली सुधार याडः अरनिको राजमार्ग, सूर्यविनायक

बांलागु लिच्चः देडांक लाडः वयो च्वंगु खौं ब्याकसे सामुदायिकब्वनय् कुथि बांलाकय् मफूतलय् शिक्षाया लागाय् निजी स्कूलया तहांगु लाहा दै धायो दिल ।

वयकलं शासक दलत देश व जनताप्रति जिम्मेवार मजूतलय् जनतां दुःख सिङ्गु खौं ब्याकसे गरिब जनताया काय् म्हाय् पिनता बांलागु, भिंगु शिक्षा बियता विचः याय्मः धायोदिसे खप नगरपालिकां खप देता ज्ञान विज्ञानया मू थाय् द्युकेगु तातुडः खपय निजी व सामुदायिक ब्वनय्कुथिया विषय ब्वसेलागु ज्या साडः वःगु नपां खप विश्व विद्यालय चाय्कः समाजता बुद्धिजीवीकरण याय्गु तातुड खप नगरपालिकाया दःगु खौं ब्याक दिल ।

खप नगरपालिका वडा नं. ४ या वडाध्यक्ष उपेन्द्र सुवाल ब्वनय्कुथि कासा, शिक्षाता उथिंग्यंकः हछ्याय्मः धायो दिलसा ब्वनय् कुथिया प्र.अ. रबिन छुस्याकी, गःपली टोलसुधार समितिया नायो रामकृष्ण प्रजापति जुं न्वचु तयो द्युगु खःसा ज्या इवः या मू पाहाँ, पाहाँपिसं सिरपा लःल्हाड द्युगु खः ।

बाराही चोक निसें जगाती जुयो सुजमारीतक पाइप लायो यंकय्ता अनुमानित ल.ई. मध्ये खप नगरपालिका व काउखाली मंकलं लागत पुलय्गु नपां अः पुलांगु पाइप हे छ्यलय्गु ।

- नगरपालिका दुनयें अभ् थुगु ज्या बांलाकयता बाराही थाय् निसें जगाती च्याम्हासिंगय् निसें सुजमारी तक पाइप लाय्गु मेथाय् पाइप लःगुया खर्च जूगु धेवा के.यू.के.एल. या शेयर न्याय्गुलि हिड्कः मः काथंया ज्या याय्गु ,

- अः का.उ.खा.लि कय् दःगु पाइपनिं छ्यलय्गु, मगागु पाइप व फिटिङ्गस का.उ.खा.लिं बियगु नपां पाइप लाय्गु ज्या नं याय्गु नपां पाइप लाय्गु इवल्य सडक, खानेपानी, धःया पाइप लाइन व मेमेगु ज्याया खर्च खप नगरपालिकां पुलय्गु, ज्या भिंक याकय्ता प्राविधिकत काउखालिं ब्यवस्था याय्गु,

उगु बैठकय् काठमाण्डौं उपत्यका खानेपानी ब्यवस्थापन बोर्डया कार्यकारी निर्देशक सञ्जिव विक्रम रणा, का.उ.खा.लि. या प्रमुख कार्यकारी अधिकृत मिलन कुमार शाक्य, खप नगरपालिकाया प्रमुख प्रशासकीय अधिकृत कृष्ण गिरी, खानेपानी सञ्चालक महाशाखा प्रमुख रमेश के.सी., के.यू.के.एल. भक्तपुर शाखा प्रमुख चेत बहादुर ऐर, वडाध्यक्षपुं उकेश कवां (७), रविन्द्र ज्याख्व (९) पुं भःगु खः ।

## समीक्षा गोष्ठी

चैत्र २९ गते



खप नगरपालिकाया गवसालय जूगु चैत्र १८ व १९ गते खपया नासमना त्वालय् स्थानीय उत्पादन पर्यटकपिन्ता सालय्गु मतिं न्ह्याकगु भक्तपुर घरेलु उत्पादन मेलाया लिफः स्वयगु ज्या इवः खप नगरपालिकाया प्रमुख सुनिल प्रजापतिया म् पाहाँलय् जुल ।

## नपालाय्गु

खप नगरपालिका उप प्रमुख रजनी जोशी हेटौडा उपमहानगरपालिकाया का.प्र. राजेश बानियाँ जु नपां हेटौडाय् नपालाडः थः थः गु अनुभव कालबिल याडः दिल ।

उगु इवल्य् भनपा का.पा. या दुजः रञ्जना त्वाती, वडाया दुजः इन्द्र बहादुर प्याथ, हेटौडा उप महानगरपालिकाया वडाध्यक्षपुं बिष्णु बहादुर दाहाल, अधिकृत जगन्नाथ सापकोटा, भःगु खः सा वयक पिनि दश्वी मतिनाया चिं लः ल्हाडः कायो, बियोद्यूगु खः । उगु नपालाय्गु ज्या इवः सं उप प्रमुख जोशी जु खप नगरपालिकाया बचा हाकलं म्हासिडका पिब्वसे खप नगरपालिकाया पिथनात उपहार काथं लः ल्हाडः द्यूगु खः ।



## योजना तर्जुमा गोष्ठी

चैत्र २९ गते



खप नगरपालिकाया उप-प्रमुख रजनी जोशी प्रदेश नीति व योजना आयोगया गवसालय जूगु आ.व. २०८०/८१ या लागिं जिल्ला स्तरीय योजना तर्जुमा गोष्ठीसं ब्वति कायो दिल ।

## ज्या इवः

अथेहे खप न.पा. या उप-प्रमुख रजनी जोशी कमलामाई नगरपालिकाया उप प्रमुख मञ्जू देवकोटा नपां वयकया नगरपालिका कक्ष भायो अनुभव आदान प्रदान यासे नेगू नगरपालिकाया थः थः गु ज्या इवः त काडः दिल ।

उगु ज्या इवः सं खप नगरपालिका का.पा.या दुजः रञ्जना त्वाती, वडाया दुजः इन्द्र बहादुर प्याथः, कमलामाई नगरपालिकाया प्रमुख प्रशासकीय अधिकृत सूर्य प्रसाद दाहाल, कानुन अधिकृत टंक बहादुर थापापुं भःगु खः सा नेगू नगरपालिकाया उप प्रमुख जू पिसं मतिनाया चिं लः ल्हाडः कायो, बियो द्यूगु खः ।

उगु नपालाय्गु ज्या इवः सं उप प्रमुख जोशी जु खप नगरपालिकाया बचा हाकलं म्हासिडका पिब्वसे खप नगरपालिकाया पिथनात उपहार काथं लः ल्हाडः द्यूगु खः ।



## भिन्तुना काल बिल ज्या इवः

चैत्र २९ गते

ख्वप नगरपालिका पाखं चाय्क तगु ख्वप इञ्जिनियरिड कलेज व ख्वप कलेज अफ इञ्जिनियरिडया मंकः ग्वसालय् बिस्का जात्रा व न्हँद २०८० या लसताय् भिन्तुना काल बिल ज्या इवः यासे ख्वप नगरपालिकाया प्रमुख सुनिल प्रजापति जुं न्हँदें खं सकल सिया

न्हँगु उर्जा वयो अभ् संस्था प्रति प्रतिवद्ध जुयो ज्या सानय् फय्मः धायो दिल ।

चुनाव सिद्धान्त व बिचः या ल्वापु मखुसँ पद व धेबाया निंतिं शासक दलपिसं छ्यल च्वंगुलि कुंखिड दिसे वयकलं थुगुसी ख्वप कलेज अफ ल चाय्कागु, दक्ष जनशक्ति प्याहा वानिबलय् देश भन भन लिपालाइगु, ब्वनामिपुं प्याहा वानिबलय् कलेज तिय् मालिगु खाँ ब्याकसे ख्वप नगरपालिकां म्वाडः च्वंगु ख्वप दे काथं न्ह्याकतय्ता कासा, सांस्कृतिक ज्या इवः त याड च्वंगुलिं देशं दुनय् व देशं पिनय्या पर्यटक तः मनक्वसाय्क वयो च्वंगु खाँ काड दिल ।

ख्वप इञ्जिनियरिड कलेजया प्राचार्य सुजन माकं कलेजया तातुना, उपप्राचार्यपुं रविन्द्र फोजु, रत्न शोभा प्रजापति, प्रशासन प्रमुखपुं सिद्धिराम सुवाल, सन्जय मानन्धर, विभागीय प्रमुखपुं अर्चना बाडे श्रेष्ठ, राकेश ग्वाछा, कलेजया राजन जति नं न्वचु तयो द्युगु खः ।



## नखा चखा बलय् सुचुकुचु अभ् बांलाक याय्मः

चैत्र २९ गते

ख्वप नगरपालिकाया ग्वसालय् सफाइ मजदुर व पर्यटन शाखाया कर्मचारी पिनि दश्वी न्हँद २०८० या लसताय् जगु भिन्तुना काल बिल ज्या इवः सं ख्वप नगरपालिकाया प्रमुख सुनिल प्रजापति जुं ख्वप दे बांलाक सुचुकुचु याड तय्गु भीफुकसिया कर्तव्य खः धायो दिसे जात्रा बलय् अपलं मनूत स्व वडगुलिं सफाइ मजदुर पुं अभ् सम्बेदनशील जुयो ज्या सानय् मः धायो दिल ।

२०७९ या राजनीति नेता तय्गु असफल वर्ष धायो दिसे राजनीति सिद्धान्त व बिचः काथं हज्याय् मःगु खाँ ब्याकसे सकल कर्मचारी पिसं थःगु कर्तव्य पूवांकय् मः धायो दिल ।

ज्या इवः या सभाया नायो नपां वडाध्यक्षपुं रविन्द्र ज्याख्व (९), योगेन्द्रमान बिजुकुछँ (५) पिसं बिस्का जात्रा भीगु थःगु हे जुगुलिं बांलाक भिंक डाय्के मः नपां सफाइ मजदुर त संवेदनशील जुयो नखा बलय् अभ् बांलाक सुचुकुचु याय्म धायो दिल ।

अथेहे प्रमुख प्रशासकीय अधिकृत कृष्ण गिरी कर्मचारीपिसं



थःगु कर्तव्य बांलाक पुवांकय् मः धायो दिलसा पर्यटन शाखाया प्रमुख गौतम प्रसाद लासिव नं थःगु नुगः खाँ प्वंक दिलसा, स्यानिटेशन शाखाया प्रमुख दिलिप कुमार सुवालं नं थःगु बिचः प्वंक द्युगु खः ।

अध्याम, कमलबजार नगरपालिकाया प्रमुख यादव  
ख्वप नगरपालिकाय (२०७९ चैत्र १४ गते)



ख्वप नगरपालिकाया उप-प्रमुख रजनी जोशी कमलामाई नगरपालिकाय  
(२०७९ चैत्र २३ गते)



खवपय् आदर निकेतनया उलेज्या

(२०७९ चैत्र २१ गते)



घरेलु उत्पादन मेलाया उलेज्या

(२०७९ चैत्र १८ गते)

